



明齋先生集 十七

文

~ 16
2376
18

美二子



和
2376
26-18

明齋先生遺稿卷之三十三

祝告文

交瑩省掃祝文

維 崇禎歲次庚辰八月辛酉朔十五日乙亥孝子
拯敢昭告于顯考成均生員 贈通政大夫吏曹參
議府君顯妣孺人 贈淑夫人公州李氏之墓氣序
流易白露既降瞻掃封瑩昊天罔極仍竊伏念拯之
衰齒已踰七十來居墓下之計竟不得成此後更來
有不可期今當永辭不勝哽咽謹以清酌庶羞祇薦
歲事尚饗

樂樓齋

明齋先生遺稿

告外廟文 壬午

維 崇禎云云外孫尹拯敢昭告于顯外祖考成均
生員府君顯外祖妣孺人坡平尹氏伏以拯之弟推
奉祀有年矣推今季過七十又喪其室茲又議定以
拯之次子忠教屬之奉祀而忠教未及別居今姑奉
安于拯之禰廟之右以待忠教之別立祠堂而後移
奉焉再三遷次不勝感愴謹以酒果敢伸虔告謹告

告祠堂文 甲申

臘日一節既載要訣從前不行未詳其故望日茶雖
不用果則有之併果闕之心常不安此兩段請從今

講行敢此虔告謹告

交塋暨表埋誌告文 巳丑

維 崇禎云云伏以墓前表石陰記昔龍西叔父所
述而石湖府君書之誌石則拯謹泣記今當暨表埋
誌瞻掃封塋昊天罔極祇役之始謹以酒果用伸虔
告謹告

大拜後告禰廟文 巳丑

孝子拯千萬意外以今月十六日政蒙 恩授議政
府右議政不勝驚惶之至匪分叨忝至於此極末梢
顛躋理所難追惟望先蔭所及使之早蒙鑄罷獲免

大戾又不勝憂懼祈祝之至謹告

祠堂 贈典告文

維 崇禎歲次庚寅四月丙申朔日孝子拯敢昭告
于顯考成均生員 贈通政大夫吏曹參議府君顯
妣孺人 贈淑夫人公州李氏拯奉承先訓蒙被餘
慶竊位于朝至於此極自陞二品以後津以 國典
當有追 贈而自以未敢應 命之故不敢循例上
請矣頃者儒生陳章請 特贈爵諡筵臣繼之又請
特贈祖考兩世爵諡即蒙 允下以贈爵贈諡可也
六字 御筆親題於該曹之 啓乃於正月二十日

政顯考 贈大匡輔國崇祿大夫議政府領議政兼

領 經筵弘文館藝文館春秋館觀象監事 世子

師諡號則未及議上似當追後顯妣 贈貞敬夫人

顯祖考顯祖妣 贈秩亦同初以不肖不敢請 贈

之意上達至於有此 特贈恩出例表昊天罔極昨

以所叨職名未解待 命於縣門之外今幸蒙 恩

許遞歸伏私次始敢謹奉 教旨以告不勝感咽之

至改題一節謹俟 賜諡之日敢並以虔告謹告

亾子婦羅州朴氏神主改題告文

維 崇禎歲次辛卯三月庚寅朔十五日甲辰舅使

子行教告于亾子婦孺人羅州朴氏行教於甲戌季
登第歷職內外婦人之從夫職隨品有號而不容續
續告改故因循至今矣行教乃於去月蒙 恩陞拜
承旨孺人亦蒙淑夫人之 贈幽明之間實共 恩
榮言念存歿不勝感愴茲奉 教旨以告仍改題神
主惟爾有靈尚克嘉之謹告

諡號下 批後祠堂告文 辛卯

維 崇禎云云伏以五月十六日政諡號下 批以
文敬文元文貞備擬以首望 落點祖考諡號以文
正文敬忠正備擬亦以首望 落點兩世 恩典同

時得成祇奉 寵光昊天罔極迎諡之禮事有未遑
勢當追行敢先伸虔告謹告

書院祝文

鴻山東峯祠春秋享祝文 壬寅

泰虞之權夷齊之義千古清風百世永祀

金堤龍巖書院春秋享祝文 壬子

孝著善喪忠不撓守厚澤未斬流風愈久 右文良
公趙簡

休休容物懇懇扶陽士林宗慕矧我舊鄉 右文平公
李繼孟

為仁之本百行之源名雖勿銘德實難讓 右建溪羅
校理安世

洪州魯隱書院成先生春秋享祝文 丙辰

身全仁義功在綱常世代愈久崇報彌彰

懷德崇賢書院同春先生春秋享祝文

圭璋令質洛閩法門有德有業光我淵源

恩津金正郎秀南祠宇春秋享祝文

主辱臣死義重身輕兩朝哀榮百代風聲

公州道山祠宇春秋享祝文癸酉

博學篤行清風卓節遺編炳然百代可識右晚梅

心愛而公氣養以直一誠成德永式後學右炭翁

潘南書院春秋享祝文丙子
右潘南

忠成死國義著尊王正學大節百世可忘

學並宗儒忠遏巨奸克繼乃祖永式後人右治川

龜山書院龍西先生春秋享祝文

氣質清和襟懷灑落志存麟經道在羲易簞瓢非憂
教育是樂遺風百世誦慕無斁

務安市南先生書院春秋享祝文乙酉

體用正學致澤至誠風韻長存百世是程

龜山書院春秋享祝文

淵源正學忠信篤實蘊為懿德樹以大節魯丘匪遠
士林同尊風聲接連百世苾芬右後村

體剛用柔德盛禮恭清風和氣藹然其衷餘教在人

沒世難忘俎豆相望家國之光

右童士

祭文

東峯祠梅月堂奉安位版祭文

壬寅

伏以秦伯逃蠻夷齊採薇曰德曰仁聖人許之嗟惟先生所遭寔同千載一心白日在空往往穆廟栗翁作傳實奉明旨幽光以闡匪宜知我無待後世標節扶倫風教攸礪維茲飛鴻觀化所於爰有遺像在彼梵廬有來守土爰暨章甫揭虔以誠表厥瞻覩尋移堂宇于校之側俎豆得所精禋罔缺視此寫真頭陀舊形斷髮何病清風自長願惟粗迹中權一時

百世所師蓋不在茲明宮象賢自有制度圭首方跌以木爲主僉謀士林就正有道穆卜良辰敬妥新造青衿畢至醴香牲脂禮儀卒備嚴奉彌肅噫彼六臣孰非一義尚欠顯享聖朝闕事公遊方外不麗丹書崇報克伸法所不拘此實數存彼亦有待肇此明薦采增感慨爽靈不昧洋洋上下庶我臨顧永激貪懦

黃山書院并享靜庵退溪時告三先生文

癸卯

伏以晦翁之後吾道遂東羣賢承奮以彰休明之運然而不闡絕學莫盛於靜庵趙先生沉潛義理莫淡

於退溪李先生卓然爲百世之師而克接乎千載之傳則茲已有我文成公之定論矣當初祠宇之設也制度草創揭虔之禮未遑僉舉今因重修之際聿追先正之議敬以二先生位板奉安於西偏蓋亦遵石潭紹賢之遺規矣嗚呼淵源流通統緒端的合席同堂洋洋如在尚有以默相我後人授受服行措諸事業傳之永久而不失其正則又豈非吾黨小子之太幸也肆涓吉日章甫鼎來恭陳明薦式告事由

黃山書院奉安二先生祭文

癸卯

惟我青丘僻在海上父師肇迹人文始朗三分世降

九法復敦陵夷羅麗否晦沉痾 聖朝將興風氣先啓圃隱前倡寒暄後繼或微未著或行未成於皇斯道鬱而不章荷與先生天篤降之玉潤金精鸞翔鳳儀妙齡得師操戈入室內敬外義左繩右墨仁爲己任聖斯可學蘊之德行行則事業揚于 王庭孔謨周經矢見吾身堯君舜民真儒得位善治指日羣龍天矯羸豕躑躅大猷未升奇禍旋發惇京侂賈今古一轍身雖可隕道不容泯流風烈烈沒世愈振人尊道學世秉彝倫俾我東土如夜復晨褒崇于朝講習于野俎豆于鄉愈久罔墮維茲兩湖維土之林繫有

明宮在此江潯曰李曰成爰暨金氏昭承統緒秩享宗祀沿流溯源敢昧其始肆奉神板妥于首位後學之願先正之議辰吉日良潔牲芳醴比肩而次實惟文純上接下開功厥惟均恭惟百載炯炯一心尚冀陟降共垂顧歆啓佑後人俾無墜荒否短泰長惟永無疆

靜庵先生

孔孟既遠周程爲宗厥惟大成允集晦翁博約正脉明誠極功開蒙萬古如日之中誰爲說說內禪外儒人心蠹賊聖路榛蕪逮我 皇朝寶被其禍浸淫瀾翻思易天下猗嗟先生挺生遐偏不階師承獨得遺

編資本純粹志亦精專潛心竭力仰高鑽堅沉涵積久融會無間取之左右如誦己言德盛禮恭業隆心小動必師古言則依道不立新奇不自滿假謙卑慎密卒無大過任道既篤闢邪斯嚴曰陳曰王是訂是砭大統其明吾道遂東一正士趣丕變民風家遵家禮人尚小學式至今休繫誰之澤賸享聖廡專祀仁里崇報之典久而彌備顧茲湖甸匪鄉匪寓惟我後人式同尊慕載陳俎豆敬揭神位洋洋對越警泉在地最西一卓靜庵之座文成文簡以次而左亦有文元末至以繼一心相傳百季無弊前後作興地邇世

近光我 聖代克配奎運肇此明薦敢布虔誠於昭
上下惠以光明節要有書理學有錄式相其行俾我
無斃

退溪先生

月峯書院追配金文元文敬兩先生祭文 癸丑

恭惟文元稟賦甚偉渾厚莊重崇淡弘毅早親有道
篤信嗜學尊聞行知老而彌力主敬立本致禮作程
要其積久極乎純明格王事正嚴師道尊有德有業
天與斯文允矣文敬嗣挺令質精粹端亮剛和溫栗
鯉對鶴鳴善繼與述一誠不懈至于人耄德言其崇
行過乎恭人勞我安君子有終晚季一出 盛主盛

時春秋大義千載有辭嗟二先生父子師友席間商
丈五紀前後噫吾箕封素秉周禮然其大備逮我兩
世愛敬名分儀章度數吉凶經變難疑紛糾是纂是
編是辨是剖文治寔賴承學以牖道紹前哲功啓來
裔俎豆崇報有舉罔替矧茲鄉邦平章故里風聲攸
被宗慕自異舊有精宇三賢同宮訥齋思庵爰洎高
峯清風正學豈殊源派合堂賡享禮亦匪差肆涓吉
辰敬妥新位世序尊卑以並以配久闕可陋今講有
待不顯其光於昭如在典刑鼎新瞻聆咸聳南紀大
賁瑞石增重陟降惠我俾永無斃馨香始升款誠並

徹

扶餘義烈祠奉安祭文 乙卯

恭惟茲邦百濟舊墟歷羅暨麗千有季餘山夷谷堙
響銷影滅惟我三忠至今有烈昔國將亾君謫其憂
仇言簡賢乃竄乃囚忠不忘君義敢怨國臨死上書
遇急效策竭智盡誠淡謀至計王聽不聰眾讒交蔽
江山失險社稷已踣噬臍已晚抉目何益黃山之役
實決存亾誓眾沫血斬屈馘昌兵孤敵滋力窮事敗
有斷無降生辱死快在昔烈士家族先沉噫彼偷生
妄訛何心殷之淪喪厥有三仁各全天衷何媿古人

睠言江澨長沙遺躅妖髡弄權舉朝莫觸袖草奮義
對仗叱奸撻鱗撩虎觀者膽寒公死肫誅忠彰事畢
王氏五百諫官第一高山大野石灘明月典刑長存
清風不絕噫此秉彝人所同賦時有前後理無今古
薦紳章甫氓俗誦傳咨嗟想慕孰使之然往往 萬
曆初茲精字異代比肩共享俎豆栗翁紀蹟義聲增
光顧茲百載吏惰士荒咸用悼懼不引或替爰謀爰
度拓址恢制亦既訖功奉妥如禮日吉辰良薦此牲
幣永惟爽靈百代如生尚其昭格俾民作程頑廉懦
立義重身輕載新報事式告以誠

洪州魯隱書院成先生奉安祭文 丙辰

觀古易姓臣不事二夷齊首義代有烈士至若革除社稷如故猶不二心明有孝孺當其有廢萬物覩聖豈不知變諒守吾正嗟惟先生所遭實似父子並命儕友偕死義重身輕理得心盡初無所爲後有何怨噫茲魯洞神問舊宅有廬巋然過者所式尸祝有議公私多諱迄用沉鬱志士爲歎孰發其幾木主自出人心感奮天理難遏爰謀士林爰創精宇執我豆籩寓茲興慕四字 玉音炳如訓典英靈陟降膺此休顯正氣長存烈烈愈光尚惟啓迪永扶倫常

崇賢書院追享同春先生祭文

熙運休明羣賢繼興式至栗翁大道以弘孰傳其宗有卓文元主敬執禮立我法門先生是承發軔甚早操存于中繩尺其表資旣粹美養之有方精明內腴自有輝光師門禮書功被後學難疑成編寔資羽翼元爲善長在時爲春揭之扁堂全體斯仁粹然成德蘭馨玉潔可敬可親莫不心悅九臯聲聞 天書荐下有以自守十年靜坐及其一起 盛主盛時明昭義聞懇倦經帷魚水之契晚而益至 上下相孚君臣父子 聖考嗣明賓師愈隆身有進退誠貫始終

志在憂國逞恤吾躬力疾拜章排奸畢忠世道將喪
樑木先摧滔滔黨禍竟及泉臺社稷有靈凶逆誅夷
精忠明見九重是思復官 贈祭哀榮無憾凡在
瞻聆孰不興感惟茲明宮杖屨所於席間函丈五十
季餘生尊其道歿同其享 聖明所許章甫所仰載
諷吉辰牲幣是將德音不瑕斯文增光功存世教澤
及來裔尚其昭格惠我永世

恩津金正郎 秀甫 祠宇奉安祭文

惟帝降衷曰仁與義人當保守之死勿墜聖賢之訓
特致丁寧捨生而取殺身以成嗟惟我公篤信於此

所以臨難成就卓爾公惟少孤事母稱孝洎得依歸
益有所造釋褐登朝半世下僚不值歲寒誰知後凋
丙子之變天地翻覆 至尊蒙塵 宗社危辱江都
保障實維天塹大事一去金湯失險賊不可迎身不
可汚位有高卑殉國何殊身隨烟滅志與火烈義盡
仁至樹此大節有即其地揭虔賸享綱常允賴在國
有光逮我 聖祖追葬英魂銀臺 寵贈恩徹重泉
聖考加褒棹楔其門哀榮之典愈久愈新噫此市津
寔公鄉園閭井依然典刑如存俎豆之議久而未遂
士氣不振吾黨可恥今纔輪奐以妥以侑風聲所暨

遠邇快觀秉彝同得觀感自別興忠起孝百世是式
日吉辰良牲肥醴香尚其陟降惠我無疆

松都潘南書院奉安祭文 壬戌

猗歟先生挺于麗季正直宏毅天賦特異寡默其言
慷慨其志本以孝友奮以忠義維時吾道甫來于東
誰其倡者牧圃諸公同明相照講習泮宮丕哉正學
紹我箕邦有質有文有德有業繇身及朝庶幾禮樂
正值河清中國 聖作出自幽谷欣觀日月噫嘻天
意奈何難諶既生賢哲又值奸壬讜議不伸究禍乃
淫堂堂正氣一朝湮沉當其變故孽臣擅命謂 帝

可背謂此可迎社稷危辱綱常斃喪人皆疑貳莫有
櫻抗先生特立忠憤激中昌言逆順以明吉凶首請
遺奏歸誠 帝庭次數罪人當正典刑書不可署使
不可納前後一義炳如星日言發身殉國因以滅百
載之下猶可嗚咽惟鄭文忠寔同本末或先或後迭
樹風節死國忠至尊王義大雖闕當時實賴後代嗟
我舊都事別他土俎豆崧陽已有季所生而並名沒
寧異視廟貌獨闕士林之恥元老陳謨 聖心感動
特賜節惠致祀丘壠又 命建祠于彼遺墟前媿怠
緩後敢虛徐釋經敦事踰季告成涓茲吉日妥我英

靈正義明道忘身殉國精爽不昧凜然如昨夷夏大防君臣大倫孰爲其本性理淵源維茲秉彝非有今古尚冀陟降永激頑懦

代仲父祈雨母岳山文

已亥

伏以旱魃爲虐旣甚赤地之災明神是恭敢徼黎民之惠可哀無告庶感至誠竊惟茲邦所瞻維嶽作鎮合雲興雨陰宰造化之功除穢降祥顯膺望走之責民以大賴迄用明禋屬此易耨之時乃有憐焚之酷曠脩曠濕已見草木之皆枯竭頻竭中又聞山川之如滌入有良秬莫載澤澤之耕野無新苗其柰杲杲

之出命將近止不但百畝之憂時不再來坐失三農之節雖幸有滄之累日亦曾不足於一犁密雲淒風其雨之望已斷黃童白叟于壑之急方臻顧茲一介之腐儒叨分百里之重任邑流身病久媿韋刺史之俸錢政拙心勞合書陽大夫之下考惠鮮無術立視平陸之羊威制非才夜吠山陰之犬靜言今日之致沴實由長吏之無良寧丁我躬豈可移民而移歲爽惟天殛無亦在大而在多爨身焚軀我敢憚暑蘇枯降澤神職爲人茲將予遺之民爲乞須臾之命冀精誠之有格我亨我將庶靈應之不遲以陰以雨

西峯新居祭土神文

丙辰

屏蟄微蹤孤露餘齒邈矣先壠理合歸死名浮懼累
迹近多忌忽反以惕欲動還止睠彼遺廬在美之里
豈云不陋顧分猶侈爰謀樹屋于此山趾苟全非幸
固竊是企嗟吾半百所成何事骨枯易得河清難俟
斯文潰裂素業荒墜靜言撫躬中宵永喟惟兄惟弟
惟父惟子尚其夙夜兢兢惴惴惟寡尤悔免貽羞恥
酒果告衷神庶鑑只

代輔仁堂儒生祭清陰金文正公文

壬辰

嗚呼先生百鍊精金文山諸葛異世同心扶桑以西

若木之東昏陰腥霧慘憺悲風先生獨立大冬松柏
終始所樹百世不惑天翻地覆國破君辱吞腦不
死裂書何益匹馬去國蹈海道躅超然高舉江漢
以濯三季雪窖大節彌彰四海聲名日月爭光重
明繼照率土顙望白首趨朝初心益壯志雖未伸
士望愈隆居國東郊隱若岱宗社稷攸依綱常是
賴謹議以行大義不晦君子得輿天時可待黃耇無
疆士林同喜斯文不幸世道終否鳴鳥未聞離日遽
昃天下咸悲九重有惻款款遺疏炳炳忠赤擎天
素志之死靡忒生順死安先生不忤山頽梁摧吾黨

安仰二三鯁生逖在委衙誦義千里星斗于天矧茲
尼丘臨睨昔季孝思錫類觀感自別引領長慟有淚
盈臆緘辭洄酌薦此菲薄英靈烈烈正氣如昨鑑我
微誠庶垂歆格

祭從弟搢文

乙未

嗚呼痛哉以吾子成之稟質之美受材之厚而曾不
得二十以死耶清潔之精神英發之志氣朗然蘭玉
之相泠然琴瑟之音不復可得而見之矣嗚呼始子
未十歲而能誦經學念書發難請益往往出人意表
文思筆勢亦俱有法姿既明秀自然映徹見者驚嗟

以爲王氏之鳳毛謝家之寶樹不能過也若其溫而
勁簡而不傲蒙養既端長益雅飭至於事親之際尤
有人所難者其有疾也憂形於色爲廢寢食其有過
也必務規諫要歸於正此則子歿之後得於父母昆
弟之言嗚呼其外易得也其中不易得也其才可及
也其行不可及也子之作人亦可謂不偶矣奈何以
吾弟之賢生我積慶之家挹此才躬此行而竟不得
大有所就中道而實折耶嗚呼大道既隱淳風日斲
氣鍾于人鮮克全粹清者少而濁者多惡者易繁而
美者難保理之不能勝氣也久矣豈一疾之能死人

哉嗚呼父母呼天兄弟投琴苗而不秀昔人所悲幽
明之路一異窀穸之事已迫空山埋玉之痛苦若之何
可堪也靈辰隔晨一酌永訣文生於情以洩余哀惟
子之行尚未甚遠精靈炳然當識此意嗚呼哀哉

祭慎獨齋金先生文

維 崇禎歲次丙申八月丙子朔十八日癸巳門人
坡平尹拯謹以酒果之奠敬告于慎獨齋金先生之
靈曰嗚呼道不墜地文未喪天靜退先倡牛栗後傳
荷歟先正允承其統主敬立本崇禮致用先生嗣興
是述是繼德尊業廣乃顯厥世稟資既異金玉其相

寬栗合中表裏交養少自肅莊晚益和朗迨乎暮歲
面背粹盎有來摳衣滌鄙消吝穆穆函文不言而信
宗匠傳家就正盈門丕承遺矩克啓後人經奧傳蘊
變節疑文綱提領挈縷析毫分季既耆耄不自暇逸
孜孜慥慥始終如一望實早隆徵聘狎至攜謙守志
進禮退義晚際盛時鳳儀天衢彙征共貞垂拱規模
污隆在命使尼非人出畫有裕介石其神十季丘園
一國星斗鮒耆寧康達三兼有祝之百齡望以再起
君民尊庇淑慝恃畏樑木遽摧一老不遺服若喪父
哀甚誅尼粵自童穉忝蒙教育得以依歸繫生之族

門墻不改薰炙永失儀形即遠小子何述智媿知聖
言乏狀德一酌精禋萬古辭訣嗚呼哀哉尚饗

代參議叔父祭白江李相國文

惟公一代耆德兩朝元輔國家龜著士林宗主三
尊備有五福兼具善始令終允矣寡伍廉恭素性清
峻天賦溫溫儀表侃侃器度玉蘊山腴珠藏澤嫵有
斐君子世難復覩弱齡蜚英池上鳳羽適丁昏濁倫
常滅數潔己自踈不惑不懼厥守貞固肇有所樹中
興道泰俊乂接武才猷奮庸雅望歸注從容省闈奠
釐藩土機神鑑朗外內咸裕睠彼名區白江之滸志

懷勇退以保歲暮水竹靜散襟靈恬素世莫公捨我
實心慕晚膺天祿百揆三府俄承恩譴冰塞瘴浦
寵辱迭來公罔喜怖髭髮無改鬼神扶護聖明繼
志需澤斯溥復我袞舄身以陶鑄險塗既盡大業方
措秉公鎮物汲魏遺矩國有賢相敵人之怒超乎無
位淡然環堵忠不忘君義豈閉戶囊封亟上款款
肺腑文武模楷上下倚固謂當百季以永終譽告老
未幾騎箕何遽天寶不愍國將誰怙公病已危一心
猶苦遺疏畢忠益愴聖諭隱卒崇終哀榮異數
朝野驚惋非私之故嗟余無似辱在德宇憑緣契誼

遂荷獎遇褊滯昏謬一無足取至玷薦剡我寔公誤
先碣書石猥蒙見付懇辭不獲勉竭拙魯病與心違
竟未仰布幽明媿負報公無路恆疾不死兩足如錮
尚勤 嚴召坐事祈顛孽不可活寐寧無寤追惟知
照尚矜癢痼月籠之下公歸有所情慙大鳥迹阻漬
絮緘辭寫哀一觴遠寓英靈不昧庶我歆願

哭白汝久 以永文

嗚呼昔子語余曰吾家在漢水南去大路不數里子
早晚入城必訪我今故人不負約而子獨何之矣子
獨何之矣嗚呼子之家之善之積應有慶也子之才

之志之美應有成也若固生之而反奪之若固培之
而反覆之豈子之命迎其凶耶何天之不可恃如是
也昨歲之春聞子之病與子文書曰吾人志業正須
此少強時節而疾患沮撓之可懼還可慨也蓋以病
之妨學為憂而未始慮其死生也及冬舍弟之還得
子手札則有永訣之語乃甚驚駭而尚以為是病裏
悽楚之辭子之堅剛未遽至此我有熟食省墓之計
可以歷宿子所握手勞苦矣曾未浹月而子之計實
來悲夫悲夫終不得以覿見矣嗚呼棄爾爺孃捨爾
昆弟去入冥冥之中而不之顧我之來哭子又何知

耶抑子之行尚未甚遠英靈炳然猶有以識我之情也耶路次恩怙未暇長言幽明之間從此別矣嗚呼哀哉嗚呼哀哉

哭趙平叔文 辛丑

嗚呼哀哉氣清質美志狷行果慕古好善敦薄起懦若天壽子其就必大哉而不培命也何奈愚庸甚陋盛誼寔荷申之簡書託以講磨一握巧違百年虛墮匪子迎凶吾黨之禍漢水在右洛河在左我塋隔隴子宅是妥交期泉路情素哀些邂逅臨訣子克知我嗚呼哀哉

祭敬中文 壬寅

嗚呼天乎何叔父之秉心端良宜無咎殃而不克保其令子既奪其伯於生前又殞其仲於身後也何吾弟之稟質醇美宜有成就而不克究其雅志使才不得表於當季而行不得聞於後世也何善之當福而反降之禍何賦之既豐而反嗇其壽也天乎天乎冤哉痛哉嗚呼子之事親也愉色婉容見之知其有淡愛於父母也居喪不怠不懈泣血三季古人所稱高羔少連之倫今不可見而以余揆之子殆其人也至於祭祀則必盡其誠敬檢身則必欲以規矩居家則

奉寡嫂育弟妹恩義備至嗚呼如此之人豈復易得於斯世也吾家兄弟非不多也而余於子獨甚愛之口雖未嘗言而心之素所相期者則蓋不淺矣孝悌之行既有其本矣剛介之操又有其守矣用心不雜故可與研精而讀書立心不苟故可與講究而復禮若其慨然有隆師親友樂善向道之志則是其有意於古人所謂聖賢之學而不欲以一鄉之士自安也余將託子切偲賴子琢磨交修胥訓勗以征邁以爲庶乎其不孤矣子之營德村新居也余心喜焉以其與槃廬密邇春詩夏禮可以朝夕相聚朗月清風可

以展履相尋矣豈料夫屋纔就而子不畱志未成而事已乖使我長慟永喟歷月逾日而不能自己也耶嗚呼始子之病也已有危惡之證輾轉數朔肉脫骨枯藥累更而效不見人固知其不能起矣而子之神明不亂氣宇恬和未曾有怛化之念見諸言面人實恃此猶幸萬一其復踏陽界也及其臨絕之前夕則奄奄然惟續息僅屬耳余握手與訣三稱命矣之語而子猶開目以視聲在喉中曰命盡於今宵矣氣雖已微而理不爽了無悲懼之色死生之際斯亦人所難者蓋出戶而不覺淚之沾袂翌朝再往則已不及

見其行矣已矣已矣哀哉痛哉子之就木倏爾二旬
今又祖載言歸窀穸陳詞侑觴言不盡意英靈不昧
想有以知我之悲矣嗚呼哀哉

哭鄭晚昌

普衍墓文

維 崇禎壬寅之三月己亥坡平尹拯方有嶺東之
行道過故友鄭君晚昌之墓原草已蕪厚夜不晨思
舊感懷有涕盈巾顧以行未宿戒橐無餘糧心香空
注桂酒莫將乃爲文以與之訣曰才高氣清欲寡志
大尤翁知子子又何悲寂寞空山蕭條曠野故人哭
君君克有知英英顏色灑灑精神安得今世復見斯

人狂狷異偏進爲同趣安得平生復見吾友

祭修撰從兄文

壬寅

嗚呼哀哉天降割于我家何其酷耶春旣奪吾敬中
今者吾兄胡爲又至於此耶惟我兄弟生歲相先後
於十季之內者十餘人少而同嬉也長而同好也相
合則驩然以樂而相離則怒然以思也雖聚散無常
而擬同百季以周旋也孰謂今日遽作如許之別而
竟亦不得執手也嗚呼哀哉拯也昔讀胡文定公稱
崇安二劉之書曰德門積善久矣如昆仲出則奮其
才力建立事功居則進修術業養成德器乃邦家之

光於是心竊慕而企之雖以弟之朴鄙蒙陋固不敢自弛其向善飭行之念而其望於吾兄者則有大焉所以篤忠孝之節勵清白之操盡其才誠爲世蓋臣者誠不敢以古人之下奉待庶幾交修不逮有爲有守以不墜我祖先文獻之傳毋忝其家庭詩禮之訓余心惻款實以千載爲期兄今已矣安得不使我慟哭而號天也嗚呼哀哉往歲聞兄奉命南疆追以一書候之蓋以元城之誓爲勉而陸賈之橐爲戒以兄之明且剛敢以此言規之可謂妄矣而還書誨答開以盡言副之二絕辭意鄭重竊觀其所存之確然

已無待於人言矣蓋其賁以自隨者乃寒泉之錄退陶之節石潭之輯所嗜者在此則宜乎外誘之不敢近也噫從事於此豈但施於使乎一節而已哉以如此之質抱如此之志且將有如此之學而乃季止於此此奚止愚弟之痛實父兄師友與當世志義之士所共傷惜者也嗚呼哀哉曩兄之築書室於鵲泉也實爲冠童居業之所將勗率諸兒教以灑掃之節屋纔就而兄仕于朝雖不克踐約言猶琅琅在耳噫安敢忘也顧以形有所格孤寡北旋吾將不能視兄之子猶吾之子也幽明之間爲辜負當日之意矣嗚呼

死生異制時日不留兄將祖載適彼夜臺夜臺冥冥
不可復晨矢辭告訣言不能倫英魂不散當諒此意
嗚呼哀哉

祭元禮文

甲辰

嗟嗟元禮去此何逝凡民有言莫樂陽界天地高竊
日月明揭人物遂生山川無際惟彼冥塗晦昧幽翳
有夜無晝莫與昭晰茫乎惚焉底處止屆爺孃未老
子女婉慧高堂壽康板輿愉豫變彼少婦鉛華未替
爰有朋友亦有昆季左挈右提以文以藝平生恩愛
謂期百載胡爲棄捐莫我戀係松楸桑梓舊宇新第

引水盈塘方石作砌庭梅發萼獨鶴清唳繫觀其房
書冊滿几於焉諷詠可以遊憩咸其如昨子獨蟬蛻
坎中高外子宮是制淡淡歸卧幾時臨睨子昔有言
不顯我世我厥不奮後嗣誰繼劇目鉢心以自淬礪
小成匪足大闡是誓庭闈日夜望子折桂緋袍象笏
榮我祖禰今焉墮甑已矣何逮追惟雅志寧不隕涕
嗚呼噫嘻死生常例天地之大久則亦弊總總萬物
與化俱遞人在其間渺然一米壽夭貴賤今古同瘞
達人遐觀無有凝滯俯視滅沒同蚊蟻噉噉者哭
只見其蔽萬事悠悠何足數計最有可悲子實明惠

志在溫恭行惇孝悌守拙有恥畏大謹細父兄嘉愛
儕流稱譽有才如此季不少傒氣鍾於物濁頑清脆
天霜一降先折蘭蕙其悲奈何理則斯戾子之平日
每恨有杖則四斯男始訖而慰子之就木有踊如禮
異日成子其在於是命短福長殆天所畀魯巷同居
今茲二紀匪子從我我即子詣居則對案出惟連袂
名雖再從情實一體丙舍習學山齋修稷云云諧笑
款款心契子最少季明眸皓齒四體輕俊又無疾疹
每指而羨莫如子美孰謂奄忽遽在今歲咄哉吾家
禍一荐至往歲拯我章兄敬弟維此兩人羣從之最

階庭索莫門戶殄瘁與子同哭淚尚在眦子又至此
天何不悔日月幾何子殯已啓柳車嬰牆丹旌旆旆
出祖於庭駕言歸稅英英眉宇那可復睇洗盞餞子
酌以芳醴據地一慟此悲誰洩陳辭告子子其知未
嗚呼哀哉

祭市南先生文

維 崇禎歲次甲辰四月癸巳朔六日戊戌門人尹
拯謹以一瓣之香一瓶之酒再拜敬奠于市南先生
柩前而哭之曰嗚呼先生何爲而至於斯耶小子嘗
謂先生當以角巾野服謝事南歸而拯也負笈操几

往候林下擬奉百年之樂於江海之上也豈料先生不肯少留乃棄吾黨遽在今歲使小子只得拚輻一慟而永抱山頽之痛也嗚呼鞠躬盡瘁忠陛下而報先帝武侯之心事鬼神亦泣吾志可行不苟潔其去就明道之至誠金石可通先生之遲回日邊不忍便訣者豈有他哉惟此義耳拯雖不敏豈不知此而敢以寒花晚節之句仰誦於前日者實憂先生側足於崎嶇之地進不能以展其蘊殉身於夙夜之勞退未有以傳諸後也嗚呼位止於此者時也季止於此者命也孔明先死伯淳無福者天也惟時與命非先生

所能取必於天則亦惟先生自盡吾心而已任運觀化更有何憾耶惟是小子之所憂者不幸而遂成千古之恨則安得不使我永號長痛而不能自己也嗚呼哀哉拯也自幼受先生之教誨荷先生之知憐先生子姪視拯而拯以父兄事先生則恩義可謂至隆矣而僻蟄人事重以孱疾先生之病閱月逾時而竟未能趨侍牀下舉扶易簣淵冰之戒祇承於夢裏袒跣之哭未及於寢門今始匍匐來迎於一日之程辜負平生慙痛何勝路次悲違言未盡意容俟即遠之日夏畢微誠伏惟先生俯賜鑑臨嗚呼哀哉尚饗

又祭市南先生文

維 崇禎歲次甲辰五月壬戌朔初五日丙寅門入
坡平尹拯謹以酒餅之奠敢昭告于近故嘉善大夫
吏曹參判市南先生俞公之靈曰嗚呼哀哉惟靈生
稟偉氣聰明正直學極羣書沉潛廣博文惟布帛根
柢經術才實經綸步武前哲識高而遠器周而達志
弘而毅行方而潔和不流俗介不絕物通不枉尺守
不膠瑟有體有用質有其文荷歟先生將古成人既
不台輔何不黃耆天乎人乎孰執其咎嗚呼哀哉往
在柔兆國步蒼黃奸臣誤事有同靖康公時藐然百

僚之底挺身一疏邪黨膽悸雖取斥奔克壯士氣三
霜澤畔十暑山中進德修業貞固其窮屈極暫伸起
盛玉堂適值 廟議又獻否臧北竄東遷備嘗險塗
天脫馬羈自放江湖 寧考末季大奮 聖志寤寐
賢豪待以不次公擢徒中籌司是處華髮歸朝丹心
彌苦 君臣聚精國恥可灑永安中道萬事瓦解盡
瘁死已足報 先王志士少成寧不永傷昔者困衡
將謂降任跲而復興殆亦天心用之何淺奪之何亟
時耶命耶孰詰其理嗚呼哀哉公與尤翁其進寶同
義當同退一其始終公惟感然不忍苟潔憂愛一念

耿耿如結庶補袞職庶收士類庶綿綴旒庶活疲瘵
雖其施措左牽右掣尊主庇民一未如意庶冀致力
強此艱彼周旋匡救不以難懈古稱三仁各殊其迹
惟其至誠所心則一彼哉硜硜各有腸肺公且曠懷
不設涯際論無必同亦無苟異豈其有他公耳國耳
病既日甚時亦益艱慨念退休復我林泉歸轄未脂
易箠已遽家事付兒國事誰付生行死歸不叩自恤
惟此海內孰知心曲公有素業儘在靜裏有玩有樂
有述有紀儻假公季以究公志庶有發明惠我後人
進既奮施退未有傳以公止此孰云非天嗚呼哀哉

家尊於公道義交契姓惟不同情實昆弟兩家之子
鬻齏同隊均撫以育共教以誨相視猶子亦父以事
小子無似荷愛獨至提攜誘掖日惟疊疊不見公怒
每見公喜公之教人善於開發名理會通古今治忽
橫豎羅穿刃游河決每聞公言心竅便豁自離錦峽
各還故里一水相望亦豈不邇猶恨親依不如曩時
公返于朝益以睽違尚恃公齡未至頤耄待公來歸
壽考休佚於是負笈以卒吾業誰料此計已墮冥漠
儀形永隔聲歎難奉山頽一語千古至痛嗚呼哀哉
小子平生隱痛在中自矢屏藏以畢吾躬當初棄科

公爲我憂外晦內守爲我忠謀小子株滯不克遵戒
公不復強更加獎勵然猶爲我念之不置見有虛譽
不我爲喜札翰申申每賜提掇數季以來見期彌切
每感公知罔知報答亦勸公退以完晚節乃於昨季
公手薦我小子聞之始驚終訝末世標榜昔公我慮
利征非願名過爲恥公惟愛我不宜有此豈以久違
慮其有進先公後私不我顧軫公意甚勤公義甚重
不惟不退又欲人共自悼昏庸十年伎倆志弱氣強
聲馳實喪累公水鏡辱公華袞幽明難隱負媿何盡
庶堅初心不至日亾或免異日終汚門墻嗟惟此心

亦豈敢係尚賴公靈默相以導殯慎已啓窀穸將就
已乎此世不可復覩陳誠侑奠辭不盡言一慟再拜
永訣終天嗚呼哀哉尚饗

祭姑夫權公僞文

維 崇禎歲次乙巳八月甲寅朔十一日甲子坡平
尹拯謹以酒雞薄奠薦告于故通訓大夫司隲寺正
月川先生權公之墓曰嗚呼芝蘭之性異於蓬艾珠
玉之質不同瓦礫不待相較而貴賤自別然世有芝
蘭而不得充君子之佩珠玉而不得在東序之列其
不爲蓬艾瓦礫之所笑者幾希則此屈賈之徒所以

終身耿介而至於怨尤者也惟公馨香之德藹然其可襲也溫潤之姿瓌然其可寶也置之於流俗人之羣雖千百而可見則豈可易得於今世也文彩表見而其質內全色笑樂易而其守甚貞好善畏義而恥勢與利安分固窮而不怨且悶其才猷風雅固宜盛玉堂而倚金華其簡淡修潔亦可鎮躁競而礪頑鄙顧乃浮沉埋沒於簿書米鹽之間以終其身噫知公之素心不肯與世之歎老嗟卑者同其齷齪則瞑目之後榮枯屈伸何足爲公道哉而高才日替世道日下安得不爲吾黨之深慟也嗚呼小子之悲公者又

有甚焉初因奉檄之至情不克守東岡之志末爲避濕之小嫌未免蹈泥塗之辱以幽谷之清芬自刻於蓬艾之林以黃流之瑟瓚自混於瓦礫之間進未有以展其所至退未有以究其所期尚幸齒未至而仕已倦髮已蒼而氣未衰庶幾享用遐齡復我初服以爲晚節之計而公遽病矣以公之平生其所樹立止於如此豈真所謂有命也者非耶嗚呼家尊之於公同氣也同志也公之於小子父兄也師友也其情與義爲如何哉而病與貧俱人事不振病不侍而歿不扶殮不臨而葬不訣孤負幽明慙痛曷勝嗚呼昔者

拜公左圖右書前琴後幕眉宇春敷德音鍾亮今我
來斯荒原衰草露白風悲宰如宰如長卧無覺哭不
可聞有淚徹泉爽魄不昧當賜鑑臨尚饗

祭市南夫人文

維 崇禎歲次戊申二月庚午朔十四日癸未坡平
後人尹拯推等謹以酒果之奠敢告于貞夫人全州
李氏之靈恭惟夫人克有淑德作配君子以成內治
君子道否半世食貧晚乘吉泰奄罹晝哭再晷纒闕
榮衛暗燦 聖朝體下令胤專城庶幾勿藥安我榮
養眉壽寧康以享暮景何天理之難諶竟斯疾之無

醫徽音不得福履之綏孝子永抱風樹之痛嗚呼哀
哉拯等粵自髫髻之歲供掃灑於先生之門感夫人
之慈惠親撫頂而飲食之愛念之勤子姪無間追惟
恩義沒齒敢忘去秋來候得瞻顏色雖憂起居之少
愆尚慶神觀之不爽曾日月之幾何易離軒以輶車
行路悽愴矧伊吾黨門館如昨人事變遷彷徨隕涕
孰知我悲一盃奉薦少見微誠伏惟尊靈俯垂歆鑑
嗚呼哀哉尚饗

祭金汝圭 弼瑞文 戊申

嗚呼汝圭以子之才而乃奄然就盡與世之庸庸無

志義者同歸於腐滅之場耶古人於賢愚壽夭之際莫不歸之於命吾於子亦不得不歸之於命而所謂命者每若此焉此實何理耶昔慈明外朗叔慈內明子則兼之人皆謂衛氏之一璧矣余所最敬者貌揚而常抑智明而常晦資辯而常訥穆然常若有思也闇然常若用功於內也如子者蓋十人而可見百人而可見矣嘗以晦翁夫子所謂豪爽俊邁而不肯入於道德者規之子亦不余迂也孰謂百年心期已墮於杳茫而琅琅之語笑炯炯之眉目依然已同於一夢耶並遊之樂同好之義已矣已矣畢於此矣言不可盡悲不可極嗚呼汝圭與子長訣

代仲父祭趙滄江文

嗚呼滄江古之偉元偉元只廢蓼莪滄江身不共天嗚呼滄江古之子房子房不取萬戶滄江勇辭功宗孝復父兄之讎忠濟宗社之覆才如百鍊之能斷志則千丈之斯拔嗚呼滄江今誰與匹觀人者標其大節自修者謹於細行大節既如其偉細行罔非可敬行已則躬先而言後處家則恩篤而義整臨民則父教而母愛居官則冰冷而蘄苦窮約而終身者其守之貞榮衰於沒世者其實之著嗚呼滄江古亦寡

明齋遺稿卷三十三
侶蓋其淵源之甚正不但稟質之絕異允矣法門之
餘矩展也君子之素履平生用心之闇然宜爾立身
之卓爾奚翅誦義於吾黨抑可傳法於後世嗚呼穉
齒同巷白紛心契嗟我畸人出門唯子相對如水忘
老之至豈其有他子之臭味勉我優游共此終南居
然一夕永隔笑談嗚呼滄江生死浩然踽踽故人誰
與餘季觴酒陳辭詎盡衷素惟其衷素期以泉路

祭俞胤甫墓文

辛亥

嗟兄之死不可問天以家則善以才則賢志希古哲
行出今人曰既篤之胡不假季嗟兄之生人所羨慕

父母偕老昆弟無故名揚士林迹亨雲路云何一朝
變如此撫嗚呼理氣相勝福禍無端兄乎奈何自古
而然九原歸侍友于同攜兄乎有知亦又何悲有季
趾美有兒勤書述事承慶其在斯歟嗚呼兄去之歲
余罹酷罰今始訪兄墓草三宿余命之頑兄不可作
欲寫衷情清血交滴秋風獨立萬事陳迹一杯酌兄
兄庶臨格

祭俞直甫墓文

辛亥

嗚呼子之幼也父母奇之子之長也師友期之粹清
美質孝悌至性斷斷其心肫肫其行何畀之厚而奪

之速何才之高而命之促不秀不實昔人所悲吾何
怨是天實難知伯兮仲兮兩塚相對一杯來奠精靈
儻在

祭松谷趙尚書墓文

維 崇禎歲次辛亥十月己卯朔二十四日壬寅門
下生坡平尹拯謹以酒果哭奠于先友松谷趙公之
墓嗚呼惟公忠孝得於家庭文章本於經史志業在
於致澤斷斷乎其憂 國之淡惓惓乎其愛士之誠
切切乎其救民之急常爲善良之宗主每被宵壬之
忌嫉獨賴 聖明之扶植不在溫飽之初心無地樓

臺之故事盡瘁死己之晚節嗚呼公之生也一身任
中外上下之責公之亾也舉世起樑摧棟折之歎始
也與樂靜齋名終當爲市南同傳是豈吾黨之私言
可俟後來之尚論嗚呼先人於公情若骨肉童穉相
歡至老彌篤先人則勉公之退公反勉先人之仕雖
動靜之殊迹蓋相望之如此嗟小子之屏螫亦罕至
於城市瞻仰無間於尊親際遇僅止於三四乙巳南
洞之候爲誦通滯之書丁未北營之枉申命憂樂之
義噫今世之古道尚心藏而未弭昨歲扶櫬行過西
湖公戴麻而來哭有淚緣於皓鬚惠奠文與哀詞罄

平生之至懷痛吾親之不永于壽又感公貌之甚衰
儻頑喘之苟延庶獲更拜乎此生尋疇昔之緒言訴
鮮民之哀情何此計之未遂奄承訃於一夕顧余服
之未闋負永訣乎臨穴今將一杯之薦始展宿草之
塋想九原之交期杳百年之儀形朔寒風而獨立但
血涕之交零惟公靈之如在冀或鑑我之衷誠

祭宋子文文

辛亥

嗚呼哀哉平日期兄不謂止此胡爲一疾奄然長逝
兄年壯強受氣不脆中折之慮何曾夢寐昔我山齋
淡苦無比兄初忍耐疹疾始崇昨歲之事追惟血涕

惡積不滅酷禍猝被兄來哭殯握手見慰溽暑淫霖
同我苦次扶襯西歸兄實終始痛余不孝神不顧濟
水潦泥淖勒車艱畏兄親執紼塗足沾體跋涉晨夜
不辭勞瘁復土事畢返哭南指兄又護來不暇寧止
喪食奔遑以志率氣及其北旋冰沍已屆程計往返
踰二千里交廬守墓強疾來視築室義隆念孤情至
一日大雪夜幾亥子忽驚叩門衣濕表裏燠室良久
凍猶未解自恃身健未覺形憊真元潛爍厲虐乘敝
豫章凌雲一朝摧蹶頑命苟全視息人世而獨使兄
天季永棄脩短任運兄縱無悔百季我痛何時可昧

嗚呼哀哉兄之來我粵在丙申少孤失學自奮于身性識踈通志氣高蹇雖少讀書已解人言先人愛之爲之諄諄守約鮮失務實爲真除驅習氣刮祛俗纏至於取友莫大親仁指示和叔俾與周旋兄能篤信服膺拳拳退省其私不懈益虔邇來還往十有六年終始惟一是一日新世之學者口耳是專夷考其中主宰昧昏兄能默識大意早先世之學者華色外宣夷攷其行七倒八顛兄能講修古訓必遵世之學者鮮不爲人名利之間外物交遷兄能自重其守超然世之學者誠心最難得小爲足中道廢捐兄能自任

其進俛焉兄才旣豪兄志又堅由是充之可以及賢吾輩嘗言朋友之間兄與顯道可與向前顯道主行節目謹勤兄則主知多識見聞高明篤實似車兩輪吾黨不幸兄不少延斯文諸老莫不驚歎不秀不實自古而然兄乎奈何不可問天嗚呼哀哉不肖兄弟嗣守先業唯懼荒墜以貽羞辱柔愚淺浮滯固踈闊學無實功名有虛得夙夜兢兢如集于木所望如兄勝已諸益左右夾持前後鞭策開惑警惰善道忠告俾我未死得免顛覆兄於儕流吾所最服凡我有心兄必先覺補其不逮救其遺闕箴其過失愛余甚篤

畏兄明見感兄誠慤有事相謀有疑相質盍簪則喜
殆忘寢食離索則憂若抱飢渴且如諸賢如李如朴
相望之遠會合難數兄與從遊講劄親切進修功程
論議往復凡有義理必以相及信息流通無間合席
固陋之幸蓋不勝說痛我鮮民慈顏早失墓在圻西
身侍親側間歲一省荒涼孤絕霜露雨雪倍切愴悵
及至于今事異前日父母在彼瞻依靡托唯當早歸
守掃塋域杜門屏迹餘齡以畢顧此桑梓累世遺宅
親意所戀魂氣必復叔父臨季生離死別幽明雖殊
情理無隔以此遲回不忍便訣唯待早晚此計乃決

維時與兄庶相提挈兄亦有言同我歸宿暮景人事
雖或難必丁寧鄭重兩心如結浮生若寄有甚燈沫
萬事墮甌知復何及先人最狀託我和叔不肖迷暗
譜草闕略兄於先人類公明悅隨時隨處動止語默
念慮之微辭氣之末一一詳視著在心曲我未及知
兄或有識冀兄從事討論和筆訂定無憾以垂後學
兄於此事誠徹金石愍我之病遷就日月今焉已矣
已矣冥漠昨與和對相語而泣兄靈有知想亦愴息
嗚呼哀哉端午之行再宿兄所江干破窓達宵鼎晤
別來旬日消息可怕失聲驚號猶疑傳誤子敬有夢

兄升高樹謂來我禫俯索寓處朝而語故慘然相顧
計書俄至淚落沾袖文玉適會以哭相弔天既殲兄
竟未悔禍哀哀何罪維老與幼母兮哭子女兮呼父
相隨並命如入烈火福善之理乃如此謬時耶命耶
孰知其咎以况孝慈一時如許想兄飲泣難瞑泉下
嗟我兄弟病未即赴麻湖舊廬昨始哭柩門館如昔
主人已去落水先兆今方營墓一歸黃壚厚夜無曉
抒我衷腸奠我觴酒兄靈不昧我將畢告兄雖無祿
不克遠到後事可慰三胤俱好兄逝之後阿母有語
捲家南遷託孤於我其情甚感可泣行路我之庸虛
惟兄所觀死生無媿古人亦懼安能當此以冀報效
唯望兄靈有以陰輔我力所及敢不竭慮嫁娶未諧
我實兄負唯此耿耿不能自恕從當爲擇使有嘉耦
兄亦默誘俾得成就我言有盡我懷難究一慟永訣
兄其知否

祭洞文李公

德按 文辛亥

嗟公先君古之孝子爰洎孺人純德合美共職不弛
以豫親志酒食甘旨忠養不匱昔我仲父每稱道之
故吾後生耳熟於斯公之兄弟克肖其性平生孝友
可謂篤行自咬菜根親極滋味婉容愉色中有淡愛

喪致其哀祭盡其誠當其守廬手掃其塋友于同爨
綽綽有裕一室長枕如足如手推之行己不敢惡慢
小心謹慎常若臨淵蓋此一德百行之源尚德賤利
泛愛親仁畏義如刑好善如嗜十室忠信一鄉善士
非因學力自是質美嗟公兩世積累之久宜得壽祿
以膺天祐云胡舛謬反罹殃咎昆弟偕逝親懿莫顧
離其室堂魂氣彷徨理豈若是天寶茫茫嗚呼哀哉
惟我先人與公同庚自少相好至于暮齡後塘定居
公贊其成雲龍之願出於至誠教子養孫其慮甚長
藍田之約五夫之社我家倡之公實和之擬將百季
同此心契痛我不孝先子棄世公又蕩析竟與禍隨
轉眄之頃人事變移日月荏苒音容莫追遺墟相望
陳迹空留欲寫哀衷血淚先流一盃薦誠萬古長辭
公靈不昧庶知我悲

祭閔韓山文 壬子

惟公性氣高峻風義篤厚尚節好施睦戚信友親賢
如蘭嫉濁若臭豈因學得蓋全天受詩似其人筆見
其心清踈淡古罔非可欽才需盤錯志在丘樊平生
慕用沒世可諷嗚呼哀哉七十居憂聖訓有節宜有
神扶竟以毀滅達士委命强者觀志世罕執制吾何

怨是大兒如龍小兒如玉玉碎龍亡後事斷續古人
有言天道福善理豈我欺數或有舛嗚呼哀哉先人
於公奕世交誼懸榻遺風命駕故事蓬萊風月爛柯
泉石峨洋迭和咳唾盈篋往歲之春信宿吾廬白髮
蒼顏相對敷腴音容如昨萬事難追餘生獨立血淚
空垂嗚呼哀哉昔我交山素車及壙公猶強老我敢
憚病奈此螫蹤人事莫違攀輻一慟有負幽明梅殘
舊塢書聞塵帷浮生日化俯仰堪悲酒果雖薄哀誠
是將公靈洋洋庶鑑衷腸

祭炭翁先生文

維 崇禎歲次壬子二月丁未朔五日辛亥外甥尹
拯謹以香燭酒果之奠哭告于外舅炭翁先生之靈
曰嗚呼哀哉衰齡大疾固知可憂神觀無變妄謂乃
瘳矧伊靜養必得仁壽誰言一朝遽爾啓手豈世將
亂哲人先萎抑其任運與化俱歸生無所怍歿有餘
祉公乎奚憾吾黨之唏嗟我小子少依教育不以愚
庸愛予甚篤事必求是先訓每誦禮貴本實師傅是
講德容薰感醇耐如飲雄辯暢發江河若決胃懷洞
徹物我不形吾心悅之學而未能惟公之學本乎心
主心安理得沛然行去心苟未安理斯可疑稍涉安

排俊是人爲孝慈勤儉家人從化忠信謙卑所居愛
慕憂時愛君進退無間出處舒卷惟盡義分敬存之
功皓首不懈固窮之節始終無改人皆憾憾公獨蕩
蕩一心戰兢三代氣像仁無欲害智惡其鑿終身一
誠以成其德自我事公于今二紀表裏言行未見有
貳義理之爭天下之公在人裕已在我及彼君子之
交周而不比未孕是媿顛沛匪悔虛心反躬隱惡用
中詩稱攻玉古有誦木士好過聞國無言伏凡茲雅
言罔非古獲不知不愠不見無悶內省不疚百車何
詬素履獨行習坎心亨公有定力我竊歎息小子狷

滯輒不自量每將童觀妄議大方不忤不鄙誨化諄
諄竭蘊殫辭誠意惻然勉我進步戒我自畫繼以手
書前後盈篋顧恐無狀未副所期惟其心藏何日忘
之先人於公晚而論交黨禍百季是非混淆心公眼
明可與辨剖倚公講訂發彼蔽蔽庶幾融會世道有
賴終焉裂潰慨其永喟先人此心公實相孚存亾之
感悼傷特殊罪喘不滅親喪既畢瞻怙無所出入銜
恤逝將源源來奉杖屨以朝以夕慰我孤露胡爲抱
悃莫之能遂前秋一省訖未再至承訃來奔萬事蓋
棺音容莫追爾來何遲情淡舅甥義重師生慙恩負

義痛結中腸日月幾何窀穸奄迫公將歸復我懷焉
託酒湛于觴文以侑公言不可盡意不可窮唯有哀
誠庶通冥漠公靈洋洋庶我臨格嗚呼哀哉尚饗

祭從叔父龍西先生文

維 崇禎歲次壬子八月癸卯朔初五日丁未從子
拯搢推擇等謹以酒餅魚果之奠哭告于從叔父龍
西先生之靈嗚呼吾宗不祿大道將窮一疾無妄遐
筭遽終斯文起安仰之歎小子抱何怙之恫儀形既
闕柳絮奄設稱觴奠誠矢辭告訣豈言語之可盡庶
衷腸之一洩嗚呼先生之心邈乎難量謂中如淡水

而吐其素蘊則可以佐霸王而答夷羌謂外若枯木
而奮其正氣則可以塞兩儀而爭三光唯其欲寡是
以神王先生之德曠然難名人間之富貴貧賤屈伸
榮辱真如風過而雲浮世上之竇客小夫婦人孺子
任其竊笑而旁評唯其內重是以外輕嗚呼耳順年
踰手啓知免夜晝代序途旅何戀平生無媿怍於俯
仰孰不曰存沒之寧順唯其遠道靡及於日暮人壽
不待於河清建康之冢骨易枯屏山之寶劍空藏興
言及此忽焉忘生嗚呼符彩踈爽襟靈簡潔霽月光
風陽春白雪祇應餘韻之長畱會有曠百而擊節名

爲公器多取爲妄生理本直不直爲罔凡茲雅言之
在耳噫我後生之敢忘嗚呼二三小子無所肖似生
長詩書食息禮義如草生春若魚在水發榮游泳不
知所以逮茲孤露中路嬰兒匍匐啼號莫知所之猶
有諸父是瞻是依每一趨省撫視甚慈蒼顏華髮語
笑怡怡九原音容彷彿見之進則潛喜退而潛悲願
言奉戴百季爲期浮生荏苒萬事川逝轉眄陳迹但
有血涕酒湛兮莫嘗辭盡兮莫聽唯悲兮無幾一慟
兮幽明嗚呼哀哉尚饗

祭申司果 滄文 壬子

嗟人之生有才實難才無大小用者當然不用而死
與無奚擇歸之於命寧不可惜君之高識識破途豎
不冒其利竟免其禍文不讓儒武謝其匹筭通九章
弓妙七札人而有此豈不謂才而以空老惜乎哀哉
溪上餘教舊家遺澤心常慕善行不爲惡貧猶安堵
壽乃踰耄生有子孫死藏先麓以此論君誰失誰得
君乎毋怨此亦云足昔我之至顛倒來見朝來暮去
逐日無倦旣媿其勤又歎其健那知此來人事已變
酌此餞君侑以斯文靈其不昧庶我臨聞

祭叔父參判府君文

維 崇禎歲次癸丑二月辛丑朔二十三日癸亥從
子拯搢播等謹以酒果之奠哭告于叔父參判府君
之靈嗚呼天乎何禍我家至此之酷乎自歲戊申以
來五季之間尊行盡矣使我一門將何所依庇子姓
將何所瞻怙耶無非我後生不類惡不止於滅身而
誠不足以感神奪其所恃以爲命者而不顧其顛訴
也嗚呼天乎痛矣痛矣世之所謂有壽者不過三說
善必福仁必祐此以理言者也外晦則內腴聚固則
散遲此以氣言者也動者勞靜者安勞者易斃安者
難危此以人事言者也惟我府君平生存諸心者不

敢有一毫之不誠行諸身者不敢有一毫之非義處
隱如顯無微不謹人雖不知天必知之則理必有其
壽矣平生歛焉冲約韜其光而葆其真淡焉清修絕
嗜好而薄滋味精神內旺筋力不衰守一而抱和有
養而無害則氣必有其壽矣中季自託於伯原之末
疾獨守夫水澤之初爻利害寵辱不足動其中寒暑
風雨無以撓其外表裏逸休靜而有常非爲保生之
道而自無傷生之端則人事又必有其壽矣以此一
門之期望子孫之願戴咸謂府君必能享期頤之壽
以永庇我一門子孫矣今乃遽至於此豈理不可必

耶氣不可恃耶人事亦有不可期者耶嗚呼蔬食菜羹緼袍布衾一室容膝風日不蔽雖固窮安分我自樂此而實非所以養氣體而調榮衛也况乎先人之憂後人之樂一生憂勤時多而安泰時少至於江湖之憂有時而通夕不寐悶時痛俗悲窮懼亂每有祝宗祈死之願雖樂天知命素位自得而信使憂能傷人則此豈不足以傷天和而減天季耶此其所以有靜養之道而不得靜養之效毋論理氣之乖舛而人事或有以致之也官多而祿少德厚而福薄名若極優游而卒歲寶則抱憂歎而終身痛矣嗚呼自

我高祖始宅於此尼鄉積德累仁而發於我祖父兩世以孝友敦睦忠信勤儉爲家法以讀書力學輕富貴守貧賤不求人知爲心法以立此門戶以保我子孫然而府君未嘗以爲滿假兢兢惴惴老而匪懈唯恐後嗣之荒怠以爲祖先之羞辱嗟我後生小子生長於斯日用於斯豈知其所以然哉唯我成法是守訓戒是畏耳從今以後無復有式穀之教誨矣無復有典刑之觀感矣無復有警責之鞭策矣其將因循放倒不爲覆墜之歸者幾希矣此一門子姓之所以隕心呼天如嬰兒之號于中路而莫知其歸向也痛

矣痛矣况搔之私情則不得不為西遷之計念之心
痛言亦涕下不忍以告而又不忍不告也痛我不肖
積殃在身穉年失母於非命亦不能自盡於喪長侍
親側隔離丘墓者奄過半生矣昨歲遭喪之日初欲
廬于墓下以畢三年則庶得以少伸其至痛而不忍
府君之煢然又為魂氣之顧戀幽明情理有不容遽
訣者遂至回復遲徊以至于今矣今也府君既又至
此矣留此欲安仰乎而浮生冉冉餘日漸促唯當歸
伏墓側抱痛待盡而已一去鄉國再歸難期將不得
與我兄弟生死相依將無以副我府君平日惓惓之
至意言及於此肝摧腸裂不能畢我之辭痛矣痛矣
日月有時窳窳已迫攀號莫逮穹壤茫茫一觴薦誠
永訣終天言不足以盡情哭不足以洩哀嗚呼痛哉
尚饗

祭伯從兄執義公 并文 癸丑

嗚呼惟靈巖然其表坦然其中邊幅不飾畦畛不形
憂之樂之未見感欣毀之譽之無動色言儻加之學
以全其好其於懿德何遠不造氣質之偏或有短長
方諸巧令奚翅涇涇居官守職斥私奉公勤以成務
廉以飭躬苞苴入都古人所恥笑貌干名匪我之事

若處以道以補其闕其於宦業何做不達斟酌之宜
豈無失得視彼汚佞自殊軌轍嗚呼寡慮善飯素健
無疾壽可吾有曾不周甲一時門戶十季科第官豈
人後未免蹇滯嗟乎兄乎命矣已矣猶有子孫是續
是嗣家聲勿墜善慶無疆是亦多祉噫又何傷嗚呼
昔我奉老興言血涕不暖不飽謂之凍餒我生有盡
此痛難昧兄宰南州絮肉時繼一日之養繫兄是賴
逮至大故待綈以歛兄辨衣衾僅以無憾微兄之恩
叩心何救無以報兄但祝兄壽誰言幽明我終兄負
禍故荐加門運殆傾餘生慄慄我懷惇惇桑梓遺墟
松楸舊迹萬事如今百感填臆送兄永歸文以侑觴
兄靈如在庶顧我誠嗚呼哀哉

明齋先生遺稿卷之三十三

明齋先生遺稿卷之三十四

祭文

祭同春先生文

維 崇禎歲次癸丑五月庚午朔十一日庚辰門下
 生坡平尹拯謹以瓶酒瓣香之奠敬告于同春宋先
 生之墓嗚呼先生之疾也小子不得聞三貴之誨先
 生之窆也小子不及與四方之觀嗟小子宗慕之誠
 闕廢於始終之際而先生眷余之義孤負於幽明之
 間感家禍之並臻痛吾哀之莫洩尋荒阡而一哭已
 九原之難作嗚呼哀哉恭惟先生天賦絕俗溫如栗

如惟玉比德沙溪之上吾道其南爰有同人翱翔兩
驂敬以爲藥禮以爲服一室存存輝光四達要其造
與我敢僭論竊觀其外和風一團一出也慎老爲之
先再出也尤翁爲之後班行肅穆朱公揆之風裁經
席懇惻范淳夫之敷奏俾先朝十季之業樹大東
千載之聲匪直儒者之遭遇允亦世道之亨明逮我
當宁有若甘盤雖賓師之益隆反進退之多艱欲去
則聖主難忘欲留則古義未安寧屑屑之憚譏竟
炳炳之如丹嘻噫上下之交古今鮮全一消一長孰
非在天任運觀化君子曰終惟其山頽士林之恫鳴

呼哀哉念我先人契以道義親與之意晚而益至惟
出處之不齊蓋飢飽之自異先人嘗言諍友道微縱
今日動靜之殊迹繫吾人休戚之同歸當盡忠善之
責庶有公私之補豈所言之必合最夫子之能受昨
歲之春牀下之拜語及先人爲之出涕感至情之愈
篤慰孤露之深悲願源源而來候指百季而爲期曾
日月之幾何奄今古之永隔尚金聲之在耳詎春容
之可覲酒酌徹泉香達一炷尊靈洋洋儻垂臨顧嗚
呼哀哉尚饗

祭梅村從兄文 乙卯

嗚呼天不佑仁耶神不福謙耶抑時運不淑善人無賴耶奈何以吾兄之良善正直之姿溫恭仁讓之德孝友篤敬之行乃奄忽而至此耶嗚呼壽夭者人之所欲惡也而兄之純孝自喪二親悲哀思慕四季一日與其生而銜恤不如死而忘哀則脩短非兄之所自惜也窮達者人之所欣戚也而兄之雅懷一謝名利韜光葆真守拙安分視世之輕內而重外者直以爲可恥則得喪非兄之所欲聞也然兄之幼也我祖考以性直愛之其稍長也我諸父以志狷稱之其長也師友以尚德不欺許之其文則大雅也其氣則春

生也其地則泰山之桂樹也龍門之玉潤也既生若人又集衆美而乃始則二豎以嬰之終則中道而闕之黃流不薦於瑟瓚荷蘭獨萎於空谷使人無所歸咎而不得不付之於命天乎神乎善人何辜乎嗚呼弟所深痛者又有焉天禍我家自歲戊申我諸父相繼棄諸孤頑喘不滅各闕喪制廓然無復瞻怙之所餘生此世唯有兄弟相依而已弟有歸死墓下之計既已告我叔父之靈矣而時變日生賤迹多礙至於竟不得動則今捨魯何適矣前頭活計亦終於此而已弟既屏伏而兄及諸弟皆抱病字俱無聞達之念

則唯當退守家訓有以不失其身而已然我弟輩則或氣駁而志下或名浮而實媿或識昧而行情慄慄焉唯不免於鄉人之歸是恐惟兄淵然之識確然之操闇然之實實有不言之信可以率我諸弟而爲之矜式矣方將敦本質而棄浮末進行檢而退文辭左提右挈我邁而征庶幾無忝乎所生不墜其家聲而所倚以爲重者唯兄而已兄遽至此萬事謬悠兄弟無祿矣門戶將殄矣區區此願亦同於任左肱而失右臂矣安得不使我長慟沉痛閱月逾時而不能自己也耶至於近日之事弟不欲興言而孝不能盡慎

誠不能交乎取笑一時貽譏千載不肖之罪固莫勝訟固將蓄誠盡言揆究源委一以畢先人平日之心一以報師門教誨之義而適會黨禍橫挈浮言交亂未免輟講息辨有口如瘖惟明乎彼此之故而可與論心於百季者唯誠伯與吾兄耳誠伯既歿兄又繼之屈指吾黨誰復知吾事者目今禍機日淡人心叵測誠有不知稅駕之所者而自哭吾兄弟病益苦顛毛如雪生意索然縱令苟全視息不過杜門自廢分作蟄蟲以送餘日而已嘻噫不足復道矣幽明異制兄將歸復于土酌此一觴訴此苦懷兄其聞此也耶

其不聞也耶嗚呼哀哉

祭李兄憲仲文 乙卯

嗚呼昔兄與弟有言於月籠山下矣暮景將暹之約至於發諸吟詠矣孰謂今日哭兄於此水之滸耶平泉舊莊綠野遺躅平生所樂魂氣必復金聲玉色髣髴可覩而俯仰存歿杳如千古痛矣痛矣嗚呼公家父子兄弟文章德業固國人之所誦也唯其令質天之賦公實厚溫而栗剛而和節而不苦簡而無傲體任自然馨香襲人人見其可親而不可褻也見其可敬而不可厭也蓋所謂朝陽之祥鳳清廟之瑚璉津

途之軌則士林之宗盟歷選明廷之彥溫太真變色之人非公而誰耶奈之何不并畀之以耆耄之壽韋平之位俾之端委廟堂而股肱王室耶痛矣痛矣嗚呼英華之外發者人皆可見而至行之在內者世鮮克知自古盡孝於所後孰有如兄者乎承顏愉色唯志是養施及外黨加人數等所至悅慕靡不感服此豈聲音笑貌之所能為哉慈孝所篤蘭玉振振豈弟君子百福方申而何命之謬嚮用不永中表起百身之歎後死抱安仰之悲痛矣痛矣嗚呼君民世道之責公非不任也鶴髮龍頭之句兄非不念也忽堂堂

而逝去曾不得以少留豈厭末路之焚濁以觀化爲
適耶抑以時運之將傾而哲人先萎耶已乎今世不
可復見斯人矣嗚呼病入膏肓禍遍師友杜門經季
人事殆絕聞兄之南始能強疾來哭松篁魚鳥助余
悽咽侑此一觴文不盡情英靈不昧其有以俯鑑也
耶嗚呼哀哉

祭俞敬基文 丁巳

嗚呼哀哉以子之美質生子之善家而乃不免天闕
者何哉我先生之厚德應覆露子矣吾亾友之至行
應有後矣而乃不能保子一塊者何哉子之偏親斫
指叩心匹婦誠感可徹重旻而不得延子之命吾家
病弟育無母之女得子爲婿愛之如玉而遽見碎於
目前天乎天乎胡忍此耶嗚呼拯之於先生則猶吾
翁也於亾友則猶吾季也嘉子之有志與才喜子之
旣冠又娶將以吾之所學於先生者教子猶吾兒而
冀見亾友未食之報於子而發之也今皆已矣無可
言者矣執手而淚如流廢牀而目不瞑想子之於此
亦不能不自傷其不幸矣子旣無奈於命吾將奈何
於子乎酌此一盃與子長訣哀哉德輿其識我之悲
也耶嗚呼哀哉

祭申道和文 丁巳

嗚呼人而有才方能有為若無才者雖有志亦勤苦而難成矣以子聰穎之才苟能從事於吾學則其所得殆將不止於此矣惜乎以門戶之計哺養之願未免俯就乎科場之業僅能登名於蓮榜而身已奄忽吁其悲矣嗟余病不能人事久矣今聞子將永歸于黃壤而不能撫柩以訣將此薄奠寄人一酌幽明之間負媿何言嗚呼哀哉

祭可教文 丁巳

嗚呼哀哉爾病之初吾不知為死疾及其劇也恐爾之心動每以緩辭慰之作如許之別而竟不能一言與訣今始為文告汝汝尚知之否乎嗚呼哀哉爾之受氣何其純美而賦命何其不淑耶生纔周歲遽失所恃被養於我姊氏累經重病濱死者數矣辛勤百罹以至于長觀爾之銜恤以思母感恩以事姑誠意懇惻發於言貌余常悲爾之心似我而感爾之行出人將欲以外家祀事傳屬於汝者謂爾慈良當體我先妣之意而不解於追遠也又能力學自期自經書子史以至程朱諸書下及於東方儒先遺文靡不貫穿身體心悟嗜如芻豢孜孜晝夜日進不厭志氣高

潔性識端慤非義之事不善之念真如關虞之不殺
竊脂之不穀庶幾益以充擴益以長進終必大有成
就以不負我先君子命名之教家傳緒業庶幾有所
付授而不至於墜地矣奈何無妄一疾奄忽至此距
爾之生僅廿有四季矣以爾之爲人未免於中折玉
碎蘭摧未足喻之天之生汝於吾家而賦爾以美質
果何意歟嗚呼痛哉孤露餘喘年已半百自竄窮谷
屏伏待盡未死之前將唯與汝父子相守吾與汝父
之衰頹荒墜望汝之輔而翼之汝兄與諸子弟之學
于家塾者倚汝之夾持而警策之凡遠近朋友之講

論往復大小事務之日用酬酢亦唯賴汝之上下而
先後之吾輩暮境所以滓擬於爾者甚重而一朝盡
歸於虛萬事已矣無可望矣吾輩亦日以老矣將自
此俵俵焉如瞽之無相矣嗚呼痛哉幽明異制窀穸
有期念汝平生孺慕之情必欲從葬於慈母之側然
彼無餘兆之可卜而骨肉歸復魂氣流通抑何遠邇
之間焉且此亦先世丘墓之下而新寓之東麓也死
生相依情理粗安爾其可以安歸而無憾矣汝婦以
有腹中一塊冀續爾嗣忍死至今若或幸而得男與
汝復生何異今日所望唯此而已言不可盡悲不可

日齋遺稿卷三十四
極魂兮有知歆我一觴嗚呼哀哉

祭朴士受文

戊午

嗚呼邵文莊有言願爲眞士大夫歷觀當代右族能不墜此四字者或鮮矣惟君家世清風峻節旣足以光耀後來而儉德眞心又能脫灑於流俗平生慕用孰有如子家者乎况子之質慤而文雅淡簡而誠篤此吾之重以心悅而自託於婚媾之好者也豈料德門無祿乃如之人曾不得四十而終耶嗚呼痛哉頃子之還自嶺外也貽我手札自言其病已不可爲幾於告訣矣而玩其辭義則猶安閒如平昔殊無恩恩

之意得書後數日流聞消息不佳驚疑之際自羅友顯道爲傳眞報矣距書出之日未能滿旬浮生脩短固皆有數而迅速無常一至於此耶設位長慟把書流涕嗚呼哀哉去秋省墓之行歷見子婦與君再得敘晤相對敷腴孰謂此別遽成故事卽遠有期臨穴無由緘辭寄爵言不盡衷英靈如在庶識區區

祭察訪再從兄文

嗚呼惟我兄弟同曾祖數十人同居桑梓之鄉行則聯裾居則衍宇不幸大兄子章兄子上兄暨美中敬中元禮天宇諸弟先後傾逝屈指少日同隊太半作

古人浮生危脆有如是者吾輩後死孤露相依有喜則會有憂則會雖無事而有思則會方其會也怡怡嬉嬉情話依依感孝悌之難久欣骨肉之團圓差可謂暮景之一樂矣唯兄意氣最豪疾病素無踰艾望耆不異年少形骸外物早白何傷三年薄宦一朝棄歸視人蠅營寧不超然每當會合拔貧為富連牀剪燭談噓不倦天餉之厚亦可謂一身之清福矣豈料夫一卧兩月歛然捨吾輩而去既不得優游杖屨以遂田園之趣而使我諸弟相視怛然悲人世之苦促而悼餘生之日索嗚呼痛哉弟之險釁又有子婦之

喪為營寔事今將西邁恐未及回復於即遠之日幽明之間從此永訣兄如有知舉我一觴嗚呼哀哉

祭再從弟執中文 元禾

嗚呼執中子何至此豈子命之不淑將吾宗之殄瘁噫子質之純美惟本末之兼備既有孝而有友又有才而有量如芝蘭之馨香似金玉之精剛蘊志行而枉躬諒何用而不臧惟內輕而外重恥名利之交驚繫踰壯而至強甘晦約以靜處惜才業之未展已年光之晚晚人為我而歎屈我委命而無愠睠江潭而卜居將卒歲而棲遯慨此計之方成奄爾然而長返

何天道之佑善乃克子而偏酷夙怙恃之並失仍伯仲之繼祿自一家之六親憾無喪之不遭恆銜恤而抱苦羗內爍而外焦恨我命之帶累終見慘於東牀育無母之穉女纔勝笄而爲孀雖排抑而自遣詎目前之可忍愍慈良之眇福庶季齡之獨引竟何殃而何辜還一疾而就盡彼免之而杖之藐弱嗣之未齒積有生之煩惱今一瞑而都忘知逝者之快適奈骨肉之增傷嗟吾愚之子好而子賢之我服惟志同而氣合儘如手而如足來輒喜而笑迎去僂悵而佇送常終夕而不厭但解攜之是恐諒吾情之如此知子

心之亦然守先世之遺業保孤露之殘季勗左提而右挈共怡怡而切切豈貧賤之足咤庶尤悔之或寡噫動靜之有數見舊棲之乍離唯我事之子知懼轉徙而遠之既惓惓而我留何忽忽而先道痛後死之日孤生意索以并無尋平生之舊遊已蹤迹之成陳望遺墟之曖曖空淚下而沾巾力吾疾而歸來撫子柩而永訣豈吾言之可盡惟此哀之一洩嗚呼執中爲子腸絕哀哉

祭庶從弟拱文 辛酉

嗚呼士恭以子之賢且才四十無成已可慨惜奈何

日齊遺稿卷三十四
季又不永而奄忽而至此耶嗚呼孝友之實行於家
庭清曠之趣在乎山林長貧而好義任分而輕外如
吾士恭何處得來至於高識遠見使人難及每與論
心如得良友今皆已矣誰復知之嗚呼孤露餘生唯
有昆弟各纏窮病恨未源源來則迎喜去輒悵惘隔
嶺相望猶用鬱陶孰謂一朝僂作明幽浮世逆旅客
死何怨鶴髮在堂遺恨應結荒庭破屋已成陳迹觸
目愴惋何忍復言嗚呼士恭君今永歸黃壤吾病遇
寒末由壙訣一盃遙餞悲不能文君如有靈尚知此
衷嗚呼哀哉

祭五岡叔父府君文

維 崇禎歲次甲子八月甲午朔十九日壬子再從
子拯謹以米食脯果之奠哭薦于不憂堂叔父府君
之靈嗚呼叔父平生不涉於名利榮辱之途到老自
適於松楸桑梓之鄉清歡常滿於一室閒愁不到於
雙眉逍遙休逸終我天季其得之於天可謂厚矣家
風孝謹何嘗有怨惡於人素性樂易宜其享福祉於
身不飾俗子之邊幅一任吾心之真率樂善慕義好
我晚節其成之於已亦可謂不薄矣儉勤保家勗率
諸弟委之長督教誨式穀成就子姪責在仲叔夙夜

征邁立揚顯親各在當人七子十孫餘慶未艾其繼
之於後者尤可以瞑目於九原矣憶昨寢疾之日每
來省候意無怛化出言孔揚曰吾死後爾輩來哭哭
罷相慰吾叔福哉此實真至之語也有樂斯丘去家
十里生焉是卜歿焉是歸死生幽明魂魄是寧嗚呼
叔父復有何憾惟我小子孤露餘喘時拜牀下語笑
怡悅思親不見如覲親顏今焉已矣誰復瞻依丙舍
宗會高堂壽席將使我季氏杖然顧影固知人生川
逝悲者無幾而此心斃斃何處可訴進此觴酒矢辭
以侑一慟不盡永訣終天嗚呼哀哉尚饗

祭進士叔父甲子

嗚呼哀哉自我孤露之後所依爲餘命於人世者唯
我先人一二同氣而已思欲朝夕源源以慰明發之
懷者寤寐在心到老愈切而病與貧俱末由如意孰
謂今日永隔明幽銜哀抱恨更無所追固知浮生同
盡悲者無幾而此心斃斃誰與告訴嗚呼叔父文如
翻水而名不登於一科才堪致用而迹未躡於仕塗
晚求一廛於山中甘爲灌園之野老自娛當富無憂
當貴不出當車畦蔬當肉即平日所謂人固局吾輩
而天亦隄之者雖其自歎之語而抑亦自遣於分命

者也曷足復言病不服藥葬不擇地平生達論可謂
允蹈而有兄在世有女在室骨肉之戀應有遺結時
日不畱即遠奄迫亭池迹陳杖履蟬蛻擬將力疾過
江撫柩一慟而病喘悒寒乘馬班如自憐吾衰人理
絕矣替兒奉訣悲不能文儻有炳靈昭此哀衷嗚呼
哀哉

祭奉事從兄 搢文 乙丑

嗚呼兄乎何命之奇乎橫逸之氣子諒之心信義之
風睦友之行德學可期也而志無所就少而讀書日
誦千言長而績文屢鳴場屋科第可拾也而業無所

成幼失怙恃銜恤平生老愈窮危靡所棲泊獨子與
孫天拯目前官纔一命壽未周甲嗚呼兄乎何命之
奇乎嗟弟於兄生較一歲髫鬣同隊前襟後裾丙舍
之嬉山泉之遊石江之會交石之聚同堂昆弟之中
唯與兄相從最專且久弟蟄鄉曲兄寄京洛中季以
來別多會少每思舊遊徒費夢想豈料今日遂作千
古之隔而竟亦不能握手與訣耶悲夫悲夫兄以江
界之行晚得二兒不可謂非幸也而既有長子理不
可絕弟意欲立正教之後以葬兄而日迫事遽未之
能及不免姑以庶子主祀以待他日立後而改題骨

肉歸復父子同原魂車飄搖將返衿陽死生幽明觸
事悲酸嗚呼哀哉昔弟見兄每悶兄醉苦口止酒怨
兄不聽今酌一觴文以侑之欲兄之飲而反不可得
兄靈不昧其果聆我之言而識我之悲耶嗚呼浮生
有涯次第歸盡孤露餘喘在世何樂睠言泉路悲者
無幾強疾臨穴空復一慟嗚呼哀哉

祭撥弟文

丙寅

嗚呼哀哉孤露銜恤在世何樂唯有同氣餘生是託
何辜于天汝先天拯手足之情余痛曷極昨汝遷居
唯從有食余傷余貧不汝能育百里而近尚歎離析

汝時來去輒復作惡矧伊如今幽明僂隔哀哀此別
何日更覩嗚呼哀哉痛余平生懵不知醫常抱罪悔
不孝不慈汝病經季只憂愈遲恃汝年盛曾不慮危
及余來視已無可爲愍汝之泣強寬以辭始聞病急
默禱先祠汝數未盡親必佑之十日相守唯此庶幾
豈料汝命竟止於斯嗚呼哀哉自汝之幼惇行孝悌
小心謹慎又多才藝汝之既長見識加入內明外蘊
執守甚堅余與恕君每惜汝賢謂或見用當必有聞
纔登上庠卽謝公車與世相棄甘老田廬今焉已矣
誰復汝知豈汝蘄知余心獨悲嗚呼哀哉余欲葬汝

葛山之陽將汝孤寡還于後塘存歿相依以過二祥
健之婦翁相念甚長俾葬其原俾居其莊山家之言
亦云允臧其意至厚余亦難強骨肉歸復孰云非命
唯是目下客寓孤絕念茲惇惇增余如割嗚呼哀哉
先人厚德壽止六旬矧余薄劣寧望久存悲者無幾
亦無足言撫汝幼穉以教以婚余心雖切余事詎必
先業荒墜百感纏結失汝強輔餘此衰疾未死之前
疇與提挈酌此一觴告汝與訣汝逝未遠魂庶來格
嗚呼哀哉

祭任郎文 丁卯

嗚呼俊卿何遽至此豈子命之短耶而女命之薄耶
抑余命之危耶嗚呼學未成志文未成名奄然而入
地者長逝之恨也一女纔齠一男纔晬竽然而無依
者未亾之哀也既悼其死又憐其生撫迹愴惋觸目
傷割老我之懷誰與訴說嗚呼俊卿何遽至此浮生
有涯吾衰日甚後死雖悲悲者無幾矣如天之幸兩
兒成長隻影雖苦猶有恃賴矣唯子之逝一往不復
子諒之性恬雅之姿謹勤之行誠一之操平生所期
萬事已矣豈獨長逝之恨而已嗚呼哀哉子始來我
卅角英英與我亾姪其生同歲如蘭之茁如玉之琢

日齋遺稿卷三十四
余心愛之若玩奇寶姪既不幸早天使我常俛然如
瞽之無相孰謂今日君又棄我視亾姪縱加千季回
首如夢亦何愈焉嗚呼哀哉初聞君病未料其危竟
未能執手聞君之臨終亦以夏未見我爲恨擬將強
疾過江撫柩一慟雖無所及庶有以少洩吾悲矣啓
期忽迫而吾病難振又未免臨發班如幽明之間余
痛曷極子之兄弟具來葬子於先山之側而余將攜
孤寡以歸未死之前相保爲命人事到此悲夫悲夫
欲叙余衷悲不能文替奠一觴與子長訣嗚呼哀哉

祭金江叟文

戊辰

嗚呼世人有遇不遇之論如以我公之文彩風流英
華外發而終於墜鬱而不章才猷氣槩器業可展而
終於抱負而不試是則所謂不遇也然是皆非我也
世也非世也命也公於平日未嘗置戚戚於胸中不
唯不置戚戚於胸中且寄閒情於花竹寓清玩於
江湖有以自樂其樂而不知老至則小子雖不足以
識公之蘊亦何敢以是爲公歎咤也哉所可悲者公
有才子蘭玉其人雅趣高識特謝儔匹謂可以伸公
家兩世之屈而不幸夭短秀而不實使我公終身有
獨立之感及夫在殯未浹月而寧馨嗣孫又見纒折

是何天不福善而司命者之戕我公一至此極耶此則不得不爲我公怨彼蒼蒼者也嗚呼公於黃先生祠廟實繼先大夫之志旣勤堂構之役用煥瞻聆又申額號之請增重斯文其所以經紀久遠之圖無非出於至誠此士林之所共咨嗟誦義者也常歎世道之交喪舊家之多誤至於疾革之日猶爲之慨念不已嗚呼是豈可與不知者道哉嗚呼公與吾先子爲同庚而相與之義晚而彌淡自小子孤露以來公之所以眷顧之者愈往愈篤爾來又二十季於此矣每一候公未嘗不感吾親之不在而歎公之歸然豈料

今日公又棄世逝水滔滔一往不復嗚呼悲乎我懷焉託日月有時啓期奄迫一觴奉餞陳辭告訣言不足以盡意儻尊靈之昭鑑

祭韓汝翼

聖翼

文已巳

嗚呼我先尊丈之於吾先人爲同年進士而至於末季遺孫師之則其交誼可見也申以婚媾事同一家亦世人之所知也然拯之慕悅於公特淡者非以他也蓋以公之中心好善斷斷其誠閱歷世變無有緇磷久而益見其可敬也非夫天分淡於物欲而不爲外物所遷者能如是乎至於天真惻款發於言貌友

悌慈和洽於門閭末俗靡靡夸毗交驚如公實德那
可易見也嗚呼浮生七十亦云其稀世路窮達何足
復論四子克家十孫盈膝根深發茂如川之方至公
之於諸福不可謂不備矣唯是手書惓惓每有復尋
初服優游暮景之意而一疾遽臻竟未遂焉長逝之
恨應在於斯而數季之別復隔今古龍溪舊遊杳如
一夢後死之悲亦何能自己也嗚呼衰病閉齋人事
已絕聞兄之柩言返舊山而末由匍匐以迎今者即
遠奄迫而又不得與舍弟偕行臨穴永訣幽明之間
負痛何言爨爨諸孤增我戀結墓草未宿之前尚有

一哭之計而亦安能自必也替奠一觴悲不能文唯
此衷曲靈庶鑑諒

祭土元文

維 崇禎己巳六月丙寅朔十日乙亥酉峯病螫聞
土元之將就窳窳而不能往訣使拙弟替奠一觴于
靈前而爲文以告曰嗚呼才難之歎自三代已然矧
茲季世尤豈易焉如子之才比之古人未知如何而
求之當世則人皆知其傑然寡儔矣其聰明英悟燭
理到底充其量可以繼先賢之學其識慮淵深持守
剛正行其志可以任世道之重以余之陋雖不足以

明齋遺稿 卷三十四
盡子而余心斷斷實以千載相期豈料其遽至於此
使世人可指而稱者只認爲孔原魯鄒志完之所就
而適貽 聖朝殺諫之名天乎天乎其生子於世而
卑子以才者果何意歟嗚呼痛哉風霆起於一夜冤
血濺於 殿陛一片丹衷鬼神在傍而莫之能暴人
雖欲百身何可得哉臨難不苟免臨死不欺 君身
可殘而守不可奪其鐵心石腸忠肝義膽烈烈與皦
日爭光有臣如此何處得來異日 聖朝雖欲悔之
死者不可復生其可追耶噫當日盈庭者孰無人心
而熟視 君過不出一言彼哉鄙夫何足責咄而使

我朝仁厚之風一朝斷絕殄瘁之歎豈但林宗之私
慟而已嗚呼痛哉凡禍福之莫之爲而至者皆正命
也君子行法以順受而已今以子之正而不激直而
不訐論議常依大體而不貴刻核氣節本於忠厚而
未嘗有偏宜若不犯於刑禍而聞子之就鞫也又能
意象從容言辭明白有剴切感悟之理無觸突招拂
之氣如此而卒不得免焉則豈非子之正命也迹其
奇禍殆與乃祖潘南文正公同文章志行亦皆可謂
無忝而惟文正則子孫蕃衍至今爲我東之冠冕天
之報善久而愈徵而奈何於子則獨無一塊遺嗣同

明齋遺稿 卷三十四
其禍而不同其福命之重不幸又何至此極耶嗚呼
痛哉哀哀我姊夙罹愍凶得子爲子誠孝幼成一家
之人莫不稱願子又妙齡立揚以榮以養如吾伯姑
之有李惠仲也昨歲坡衙面賀晚福孰謂臨老又見
此酷肝腸焦盡無處籲訴天乎天乎胡寧忍此若余
之愚則所以津擬於子者實多先人文字尚未緒正
蓋以不肖無狀之故貽辱百端不欲其早出於世以
資吹索將稍待世紛之少定委子編訂可垂永久又
常痛讒人之禍竇流於後如栗谷入山之謗牛溪殺
士之誣特出於一時之交亂而一種邪說至今傳襲

而未已然則今日先人之所遭亦安知不有甚於兩
賢哉扶持一脉之正氣卓爲頽波之砥柱淡明名實
之分痛辨公私之間庶幾指引士趨裨補世教者亦
唯子乎是倚誰知此計盡歸冥漠斯文摧棟異類陰
慶吾道之危又可勝言耶昔旣失吾可教今又失子
吾衰且病死亾無日抱茲縷縷誰與寄託而未死之
前亦俛俛如瞽之無相矣嗚呼痛哉初聞子之不殞
於當日意謂天實生之又聞血肉摧爛之餘神彩揚
揚如平日又謂志之所至氣必從之遂以爲終可以
無虞也唯日夜待其南爲握手道周矣數日無聞而

計忽至已矣已矣哀哉哀哉欲忠於國而反益其累欲孝於親而不終其養且其平生所抱負者一皆墮甑自悼不幸安得瞑目哀哉哀哉已矣已矣今聞子之大人將埋子於所居之傍麓人間父子之痛更何忍言不才而病而死猶不可堪况此萬萬於常理者耶余以病蟄人事殆絕末由赴往相對一慟而見子之八地也獨號咷於窮谷我懷如何嗚呼自聞子喪心神忽忽閱月而不能自定與其久留於世眼見無限世變無寧尚寐而無知幾何不從子於冥冥也文不足以盡吾之意哭不足以洩余之哀英靈炯炯儻識此心嗚呼哀哉

祭李相國 尚真 文 庚午

嗚呼惟公 四朝元老 一代山嶽 橫流砥柱 大冬松栢 胡不百季 以藩 王國 時運至此 世道焉託 嗚呼公 惟人傑 奮起南服 惟忠惟直 自結 明辟 特被簡擢 以貽後嗣 才猷 歷試致位 三事 引季 告休 無地樓臺 老圃 秋容 獨持 風裁 國有變故 臣敢愛身 死固吾義 生則 君仁 嗚呼 先朝 俊彥 屈指 于今 樹立 卓然 不屈 不淫 更歷 夷險 始終 一節 未知 誰人 而與 公 列達 尊兼 三君子 事畢 及此 閒暇 安歸 真宅 公

無所憾人有羨公凡今之人此懷誰同嗚呼嗟余賤庸無所肖似先人之故辱加眷視孽自己作羞及吾親人皆厭斥公獨我憐不顧羣誚終達宸聽我敢私謝公實無黨嗚呼公來踰歲我蹤如蟄尚恃公健謂有他日誰言慘感奄損天齡已乎斯世僂隔儀彤公今即遠瞻望靡及一慟窮谷永負盛德緘辭薦誠言不盡心唯其衷曲公庶鑑臨

祭從姪養一文 辛未

嗚呼哀哉君今將即遠矣官為大夫壽至周甲立朝三十季以清名終又及此閒暇安歸真宅嗚呼君乎復何憾矣唯是吾輩少小同隊情若昆弟顯晦殊迹別多會少逮茲暮景方幸相依誰言一朝奄作幽明後死之悲寧有極已孤露餘喘罪禍未殄又聞老姊之喪五內如剡心神迷塞未能為文以侑此觴惟靈不昧有以識我之懷矣撫君之柩一慟長訣嗚呼哀哉

奠告姊氏文 辛未

嗚呼姊氏常以弟等之衰病蟄伏不能源源為至戀今弟等具來矣姊氏何之矣音容已隔無處瞻覩終天悔痛更何逮及嗚呼痛哉每於書中唯以速化永

忘無限悲惱爲願今而後姊氏則庶遂願矣而其如弟等之鮮民餘生更無依恃何哉嗚呼痛哉昨季慘禍之後亟欲奉以南歸冀以暫遠喪所或紓哀苦之萬一而終不肯許及至今春始有秋後之教方將營構一室以爲子女婦孫團聚侍奉之計唯日屈指以待矣孰謂此禍又迫於冥冥而莫之覺耶天乎天乎以我姊氏之淑德懿行仁心至性揆之以理宜獲百福之報而乃反至於此極者何耶嗚呼痛哉金陵舊墓以山運之不合將權厝於此中竊惟姊氏之意必欲歸近於舊墓而骨肉歸復魂氣流通抑何遠近之

有間新墳在後姑且相依明春遷柩亦復匪遠且念存歿之託唯在此家而此家零丁亦可愍然其勢可相保而不可相離更容一家之商量奉遷舊墓於此中以優久遠香火之圖亦或一道念及於此只增嗚咽嗚呼哀哉弟等不能久留復土之後將又旋歸來無所覲去無所辭此心皇皇何所止泊本欲畢抒平生哀痛之意以爲千古之訣而淚暗于眸悲塞于胃把筆而不能成文明季永窆之日殘喘若存當復來哭其時更當矢辭而告衷嗚呼姊氏尚有以聽我之言而知我之悲也嗚呼哀哉

祭朴元老 世耆文 壬申

嗚呼惟公兄弟吾黨所服才英稱季敦靜推伯孝友
為政恭儉惟德一任真心何假外飾早卜東岡坦履
幽貞安分守拙不出戶庭怡怡綽綽終日相對有樂
于中無慕乎外嗟公兄弟誰得似之材不世用德無
人知人為公惜在公何歎憮然俱逝謂世可厭嗚呼
自吾先人相愛殊至孤露以來益以相倚跼伏窮谷
人事絕廢有時出門惟公是詣伯氏溫溫季氏侃侃
披晤永夕使人忘返季氏之剛伯氏之厚七十不衰
可期上壽何知奄忽而至於斯豈獨吾私士林之悲

公今即遠病未開蟄緘辭侑觴一慟何及

祭姊氏初暮文 壬申

嗚呼日月如駟初暮奄屈音容日邈何處復覲嗚呼
姊氏古之女士聰明仁孝柔順貞正勤儉慎敏達識
高行德一何淑命一何薄嗟人生世氣數乘除福固
難全禍亦罕俱獨我何辜偏逢百罹哀怨茫茫籲天
無涯幼時所遭寧忍更說百季此痛唯有淚血及笄
相攸于歸君子允矣君子偉然拔萃兩美之合百祥
可幾曾未十載玉樹奄摧天乎天乎善必福之若將
培之曷又覆之親心盡傷悼亾哀存獨立之時噫痛

常聞洎有令子乃幸乃喜早克晚亨實天所賜子孝而才何處得來弱冠雋翔榮溢高堂人謂姊氏有德無命而今而後受天之慶從以兩孫驥子鳳雛英英膝下爾供我娛不意頃歲雙璧迸碎自痛薄祜災猶未艾奉檄專城軒駟有煒恆懷逾分以榮爲畏經帷乞養又牧大州稱觴獻壽初度一周弟賀姊氏有子如此庶幾寧康永享祿祉誰知奇禍遽起冥冥國有變故臣敢惜生義難牽裾誠未感神哀哀夜哭慘慘斷猿手書之來咽不忍讀未亾殘季眼見此酷道絕三從刀割五內唯望速化免此苦惱悲哀焦爍靡有

限極一朝歸盡諒愜至願嗚呼姊氏銜恤平生六十餘齡以禍始終民莫不穀我獨何殃蒼天蒼天曷其有窮嗚呼哀哉孤露餘喘姊氏是恃今焉已矣久生何爲嗚呼姊氏友愛天至視我諸弟猶母於子昔推喪耦幸有兩兒大者三歲小者纔朞姊氏受之勤斯閔斯兒兮善病迭入於危晝夜撫抱忘其勞悴以至成長不自爲惠季來蟄伏累歲一拜每於相逢悲喜出涕軫我飢寒念及子女至意眷眷無有己己恩均顧復報蔑毫縷慙痛終天我懷誰訴昨歲樓山不能久滯復土纔畢辭歸遽爾墓草旣宿汔未往來一朔

一哭詎洩此哀金陵遷祔卜在今春舊山難動情理
則然適有他故未免遷延幽明之間悲鬱何言弟衰
日憊筋力難強秋當及壙今未赴祥禮服且闋沉痛
嬰腸坐想平昔但增愴怳兒輩並進替侑一酌和淚
緘辭曷盡心曲嗚呼哀哉

祭朴兄叔厚遷葬文 壬申

嗚呼自兄之逝餘四十春厚壤埋玉脩夜無晨高才
遠志千載沉淪已矣命矣夫復何言嗚呼無後有後
猶子吾兒峻拔克肖誠孝尤稀奇禍忽作嗣以再絕
天道茫茫亦何忍說嗚呼劍會有期幽宅載遷雖違

先隴此即錫原矧彼道峯平生所遊于以歸止永寧
一丘嗚呼昔兄之葬先人所庇今兄之遷弟敢不至
衰與病纏未寒先罄力不從誠瞻望靡及嗚呼坐想
音容髣髴在目義負張范情慙骨肉緘辭澗酌有淚
盈襟英靈不昧庶鑑此心

祭監役叔父府君文

維 崇禎歲次甲戌閏五月丁卯朔二十二日戊子
再從子拯謹以米食脯果之奠哭薦于從叔父監役
府君之靈嗚呼叔父天餉寶厚雖平生守拙迹未涉
於仕途而家有素封之享江湖之勝花竹之美逍遙

娛適不減於仲長之樂志彼哉世俗之名利曷足以
換此嗚呼叔父受祉亦多雖才子短命未見門闕之
榮而有孫有曾成列於眼前蘭茁而方馨玉琢則成
器積善之餘慶衰衰而未艾至於重牢盛事一家稱
賀八旬高齡先世未有終老於桑梓之鄉永歸於松
楸之麓人皆謂叔父之於生世也或可爲無歎也獨
吾諸姪孤露殘喘尊行在世唯叔父一人耳今又見
棄餘生未死之前誰復瞻依嗚呼叔父稟賦精剛筋
力猶強聰明不衰每候顏色共喜寧康期頤之壽庶
幾可祝豈料數日之間遽爾啓手奔號莫逮摧痛何

勝日月有時窳窳奄奄迫杖屨如昨音容漸邈敢奉一
觴終天永訣欲訴哀情悲不能文尊靈不昧儻垂鑑
臨尚饗

祭種百文 乙亥

嗚呼哀哉以子之慈良之美質孝悌之醇行宜有和
平之福而反見天拯之憾終亦不得周甲之年何耶
少而績文未得成名壯而筮仕官止墨綬壽夭禍福
窮達皆莫非子之命也何足復言唯吾輩孤露餘喘
暮境相依相見則歡然而喜相離則怒焉而思十里
之遠數旬之阻猶以不得朝夕相聚爲恨誰言今日

遽作幽明之別耶同堂之親存者無幾而子季差少
又孰謂奄然先逝使我抱後死之悲耶嗚呼昔來執
手而不忍告君以訣今來入門已不復見君之面已
矣已矣哀哉哀哉一孫無父一子甚弱零丁孤苦若
難保存然我積善之餘理必有慶豈無陰隲之者乎
嗚呼吾自哭君之後虛眩頓劇有如風燈之欲滅浮
生次第事悲復幾時心神俱昏言不能文君靈不昧
當識茲懷嗚呼哀哉

祭韓配商文 乙亥

嗚呼至哉孰謂君之止此耶氣宇完實神守安定諸

友之中最似長遠實不料奄忽而至此也嗚呼至哉
子之美質吾黨所罕識趣純固行義篤厚才堪致用
志能有守其為痛惜豈但遊好之情而已嗚呼至哉
自我相從今二十年雖云義合實同天屬老病之故
末由致身見君之八地也緘辭替酌悲不能文君靈
不昧尚識茲心

祭玄石文 乙亥

嗚呼 際遇方隆施設方始儒者之得位莫盛於近
世而世道之百責咸萃於一身人皆為兄憂之而亦
豈料夫曾未暮歲奄忽而至此耶聞訃驚慟心神隕

明齋遺稿 卷三十四
喪至今再浹月而猶不能自定也嗚呼歲翻之後再
承手書肝膈之要滿紙諄諄以今思之此非大期已
迫之兆耶修謝入遞未及達而訃至痛矣痛矣嗚呼
人有學道之誠然後方知師友之義重自我識兄屈
指三十有餘年矣我固慕兄而兄亦不鄙輒許以古
人之誼兩心所存無言不質靡事不講庶幾共遵聖
學之正路蘊之而爲德行之而爲業直以死而後已
爲期矣兄才既高日進於崇廣之地我力不逮自覺
其分量之限於是謂兄當出而擔世而我則可退而
守志此乃丙辰之春途旅之所訂而兄猶未肯然之

也及夫庚申以後數季之間兄必要我而同事至於
癸亥江干一宿達宵詳懇而我不能承當自是以後
世事瓦裂我則益懷牛溪所謂不見人面之意而兄
亦不復強我以必同矣然於昨歲復以正法常理見
勉則可見兄之愛人善導之至誠無已而我之自畫
已無展步之望此兄與我之所以所學所志之初無
不同而所行所歸之末不能無異者也嗚呼同者心
也異者迹也同者理也異者義也吾所常自恐者唯
或未精於義而終累於所同也兄則今已逝矣當國
家閒暇之時得抽身於朝行而觀化於故山君子曰

終夫復何憾獨此後死者俛俛於世不知終作何狀而死耶嗚呼兄雖三進於朝不得卒如兄之志而前後陳謨有本有末無非先儒之緒論古名臣之格言聖主追思命以底行則平生學道報國之心不可謂不伸而至於編述之富積成卷帙其發輝於先賢開示於後學者其志實勤而其功實盛誠可掩迹輓近追軌古昔則斯亦足以不朽矣如我廢蟄加以昏怠萬事墮甑百志俱灰真箇天地間一蠹也縱使更延殘喘亦只得泯泯如此以趨於死耳安能有所爲以不負此餘日耶最是前日權衡之說兄謂我發前人

之所未言而其於衡平之體訖未免一前而一却此爲吾兩家未了之公案而不得不俟決於後世者也雖言有不能盡者而幽明之間一心洞徹兄必有以諒我之衷而或不無遺恨於冥冥也嗚呼昔吾子文之生也曾有晚節參同之約而竟莫之遂比十許季來長抱離索之憂中間一再相遇亦以恩恩未盡說話而罷昨書問我盍簪之期求我頂門之鍼則兄之相須之意我知之矣思於未死之前一歸省墓則庶得持我先稿而就正焉以承兄劉草堂之教矣今焉已矣尚何言哉聞兄之即遠有日而老病筋力末由

爲素車之行呻吟窮谷西望齋咨而已我亦自聞兄之喪虛眩尤劇徃徃如風燈之欲滅亦安能久於世也緘辭替酌悲不能文兄靈不昧儻我鑑顧嗚呼哀哉

祭僉知叔父文

丙子

嗚呼自我先世昭靖公以上未能詳知而以下則壽未有躋人耄者至我叔父而始見焉今年八十有五歲矣聰明不減筋力猶強一門咸謂必能享到期頤爲稀世之盛事矣豈料一疾而奄止於斯耶病革之中手書告訣神明不亂筆畫如常孰謂精力如許而

遽爾告終耶痛矣痛矣嗚呼叔父資如良金貌如美玉有文有行多才多藝顧乃早占蓮榜而不得登名於大科晚筮末官而無以展布其所蘊虛老於江海之上竟歿於蓬蒿之下人之知之者莫不歎其命而惜其屈噫亦何足道哉嗚呼銜恤餘喘在世何樂離違積季常抱戀慕每擬一進瞻候顏色以慰孤露之懷而衰病之故自振良難季季遷就遂至永隔今者卽遠之日已迫而亦無由致身於壙前情理絕矣憂何言哉自經今夏神氣日以昏短亦知死期之不遠所謂悲者真無幾矣替奠一觴悲不能文設位望

哭永訣終天

祭閔彥暉文 戊寅

嗚呼孰謂君之遽至於斯耶聰明而真實志篤而業專又方進進而未已嘗竊意吾黨之士能勝重任而遠到者唯子其庶幾焉孰謂其遽止於斯耶嗚呼不幸而短命者自古大賢而已然子亦如命何哉嗚呼如我庸陋老而不死昔既喪吾土元前夏哭喬伯今又哭子所擬以為後日之託者一皆天拯於眼中縷喘雖存已同死灰此亦吾之命也夫復何言嗚呼聞君之將入地而未由匍匐往訣平生遊好之義亦豈

謂至此而止耶痛矣痛矣一觴洞酌緘辭敘哀神昏如夢言不成文君靈不昧儻識茲衷嗚呼哀哉

告訣再從子明教文 戊寅

嗚呼子乎醇良而少過自幼而已然績文取科竟未大闡自以兩兄之顯也退然有安分之意未嘗汲汲於外慕斯亦加人一等矣多男而抱孫宜稼于田方謂鄉園優游之樂不羨夫浮雲之富貴矣奈何奄暝於一疾季未及半百嗚呼子乎何命之不淑乎哀哀鶴髮夜哭隨斷尤為一家之至慘而同日相從歸祔於先公之側差可以無憾於幽冥耶嗚呼子之病革

也未能執手今始強疾及壙撫柩與訣不昧之靈知
乎否耶嗚呼哀哉

祭從弟子敬文

戊寅

嗚呼孤露餘喘在世何樂同堂之親亦唯吾輩數人
在耳相依於松楸之下聊以共此殘年君則素剛而
精神不衰調養有道常謂吾輩之中君最後死矣豈
料今日奄忽而先逝耶嗚呼自君之逝矣形孤氣索
若失肩背不知逝者之可悲但覺生者之爲苦忽忽
如夢中人事亦幾何而不從君也唯吾之所自痛者
則又有焉老病交纏荒墜日甚凡有事而相議有疑

而相質有過而相箴者莫不於君乎資之內則兄弟
而外則朋友也庶幾共守先訓而得免於大累矣今
焉已矣從今未死之前誰與望此將如冥塗無燭擿
墮而顛躓而已此亦關吾之命奈如之何哉嗚呼日
君之疾革也慮動病懷不能作別語只一握手而歸
想君亦默了此意矣日月有時窳窳奄奄迫遺廬如昨
舊迹已陳欲抒哀衷侑此一觴而心神悲憤又不能
盡君靈如其復識之否耶嗚呼哀哉

祭炭翁先生遷葬文

庚辰

嗚呼自我先生之易簀于今二十有九年矣雖音容

日遠而至言懿德之著于心曾者何日而敢忘至於常誦淵明之賦坦至公而無猜卒蒙恥而得諒之句而爲先人歎者未嘗不三復而增感也蓋小子迷方半世及至身經顛沛而後回思平日教誨之語當時之信不及者一一如燭照而龜卜畢竟自謂不敢欺心以求無忤於俯仰者嗚呼其晚矣而適陷於身伏草莽累及世道之罪貽辱於先親貽譏於後世而已竊惟先生愛余深至亦必垂惻於冥冥之中矣今者伏聞幽宅遷改靈柩復出亟當奔詣執紼之後以伸哀慕之誠而衰病殘喘遇寒作蟄末由自致其情義

慙負幽明悲恨曷極替侑一觴言又不足以盡意尊靈如在儻鑑微衷

祭從子自教文 癸未

嗚呼孰謂吾與汝爺老而不死而見汝之先逝耶孰謂汝之稟氣完健而奄忽於半百耶病不得相守殮不得躬視今乃撫柩一慟何所及矣痛矣痛矣哀哉哀哉昔汝之始生也我先君子喜而奇之用謝安石之語以命汝名汝之形貌豐碩而性質仁厚咸以爲得浦翁之一脉而汝弟又清秀挺拔人皆稱吾家之二璧矣既汝弟不幸短命而死汝亦形孤氣沮無復

有振奮之意加以居貧食力事育艱難荏苒流光迄未我一名而止惜乎其美質不得充其量終不能副我先君子之所望矣然汝之天分亦自難得寡於嗜慾淡於營爲任真而行無慕於外忠厚恂恂與物無競安分守素未嘗戚戚此皆君子之所貴也其視世之齷齪而競錐刀之利僂僂而驚夸毗之途者奚翅遠之汝之內相又能孝慈和裕一家大小咸得驩心婦人之德孰加於此嘗謂內外靜好子女蕃昌當優游安逸俱享壽福富貴浮雲何足道哉奈何一朝無妄之疾倏然相隨於三日之內素幄雙設行路慘

惻嗚呼此豈夢寐之所及哉汝爺之居家則服食儉陋居官則撫字盡誠有及人之愛而無害物之殃乃於七十之年作此窮獨之人豈汝之命耶汝爺之命耶天理何有是耶嗚呼痛哉所可慰者汝之子才美而志篤學勤而行修終必能立揚身名以顯汝父母即我先君子之所望於汝兄弟者庶乎其不墜於地而汝亦可以自慰於九原矣兩孫英英亦已繼世汝之不食之報安知不在於斯耶嗚呼汝之逝去忽已四箇月矣即遠之期奄迫略抒悲懷與汝長訣吾等亦安能久於世哉將朝暮而從汝耳精神茫然不能

明齋遺稿 卷二十四
盡言不昧者存想或知我之悲也嗚呼哀哉

祭西溪文

癸未

嗚呼哀哉惟公潘南一脉治川遺風英華彪外忠信
在躬進與時違退而固窮俯仰無忤一其始終嗚呼
人嘗期公可當棟隆招麾不動今世惟公曷不廊廟
而沒蒿蓬廉頑一節抑豈非功嗚呼大兒死直小兒
死忠一家萃美今古誰同水落之西道峯之東父子
同歸正氣彌穹嗚呼世道既喪緇素相蒙緝緝翩翩
儘欺天聰人心難誣天理自公百載之後昭如發
矇嗚呼後死殘喘百感縈中義當素車身作螿蟲緘

辭侑觴言不盡衷言雖不盡方寸可通嗚呼哀哉

初本

嗚呼往歲庚辰之秋爲永辭先壠之行歷省姊墓
與公聯枕公稱我之顏貌未脫我歎公之聰明不
減而春寒秋熱終不是長久之物相與一笑而別
矣亦豈謂此別真爲永訣也耶聞公即遠有期而
垂死殘喘末由爲素車之行略抒悲懷遠侑一觴
嗚呼公是潘南之後而治川之冑也英華彪外忠
信在中志識淡遠操守確實至於器局力量人不
可及謂公出而當路則當有格王正事之功招麾

不動之節偉然爲國家之蓋臣矣既志與時違早
辨一退斷置名利之途則簞瓢緼袍僂作寒士作
田採樵以爲生涯但見高風卓範超然於世外而
已縱不能得行於朝廷其廉頑立懦之有補於世
道者亦何可量哉然公本以金閨玉署之彥廈甍
廊廟是其處所而乃放迹於荒涼樵牧之社爲此
崎嶇丘壑之計心雖亨而身則否矣志雖伸而道
則屈矣厥有二子繼踵蜚英大兒死直小兒死忠
雖清名峻節大爲家國之光而蘭摧玉折卽在眼
中則一家情理實亦世間罕有之慘矣嗚呼今夏

之事又出意外緝緝翩翩儘欺 天聰儻微 聖
慈之特軫則幾不免收骨於瘴鄉矣是何公家力
於爲善正直不回而蒙禍之偏乃至於此耶嗚呼
痛哉所謂思辨一錄沉潛旣久劄錄成帙雖間有
出入於先賢之旨者想公之意豈敢立異要以質
疑蓋亦晦齋浦渚諸先正之所嘗爲也玄石所謂
一家之內意見雖差不害同歸於一家之事者可
謂善諭矣辛未仲夏石林之會也蒙兄發篋開示
而悲傷方劇不能從容略見論語所說類皆平易
切實不爲口耳之空言心甚喜悅以爲閒中所得

誠不易也第似有看書太淺太局之病略以鄙見有所論辨而未契矣至於中庸諸說未及遍究歸後非無借來一討之意而眼暗神昏佔畢已廢不能復爲生面工夫遂不之果蓋自己分上意思闌珊不免隨處放過殊負朋友之職矣亡羊補牢未必爲遲他山之石可以攻玉作書略效區區之愚而未得見答未知兄意果以爲如何耶至於論人一段不是細事一言涇渭之分實關於斯文世道昌言正議顧非其時則別爲論著如古人所謂三輔決錄者以垂於後未爲不可而今焉等閒說過

於人家文字無補於事而祇益其禍又以貽 聖朝之一累者何哉此皆欲質於高明而今皆無及矣嗚呼當國家無事之日考終於林泉而安歸於真宅父子兄弟歸復於一麓生無所戀死無所作嗟乎公乎復何憾矣唯是獨立暮途親知殆盡後死苦懷誰復知之設位望哭使子代奠精神昏茫言不盡衷嗚呼哀哉

祭再從子誠教文 甲申

嗚呼行一老而猶健季且不及我六歲豈意今日我反哭君撫柩一慟萬事冥漠悲夫悲夫昔君兒時育

於外家及其來自嶺東已過十歲而未入學矣先兄府君謂我曰此兒之教誨成就君輩之責也余受教而不敢辭也自後數季能遍誦經書然非君之志專而氣確安能辛苦不怠終至於立身耶亦可謂難矣君之資性木質言無嫵媚行不粉飾居家勤儉不尚浮華此實君之所長也而內失賢兄外無親友至於末路之蹭蹬豈非所謂數存者耶余每勸君退歸鄉廬以爲晚景閒養之計而君不能果往季關北之行始爲君淡憂終幸其無恙庶可以優游桑梓共我餘日昨歲歸來過冬春於栗村舊居每與相見以爲團

圓之樂豈料將搬家眷復往京中遂至奄忽乃以柩歸耶悲夫悲夫七袞壽矣緋玉亦貴矣人生得此亦自未易所卜新阡不遠先隴安歸真宅又何憾矣儻使子孫體君遺意復返故廬勤學修行以爲顯親之業則可以慰我長逝者不其在此歟嗚呼老病人事末由及壙一觴餞訣悲不能文君能不昧識我之懷否嗚呼哀哉

祭俞起甫 命興文甲甲

嗚呼哀哉我先生之盛德而不克享期頤之壽伯氏僅四十一歲仲氏又僅三十歲伯氏之子而無孫仲

氏一子亦天君以季子獨留於世季踰五十而又多
男子常聞人家壽福必有所鍾謂君當承父兄未盡
之壽受父兄未盡之福必能享有遐齡永綏其父兄
之餘慶矣豈料今日君又僅五十六而奄忽止此耶
天道與善之理何有此耶痛矣痛矣君外貌一團溫
和謙退簡默言若不出口而中心所存堅如金石不
隨人而遷變且常思遜藏於山中不求進取於世路
此其識見趣操過人遠甚今世誰有知君之所蘊者
每與舍弟推從弟掄稱道而愛慕之不但平生情好
之私而已嗚呼今日何處復得痛矣痛矣前歲之秋

往見錦峽舊居歸路來訪一宵聯枕感舊傷今憂淡
思遠別時黯然佇立久之猶以春和復期相會豈謂
此別遂爲永訣憐余老物隔江相望而病不得執手
歿不得撫棺每有良朋况也永歎安在爲兄弟之
義耶今聞葬日已迫而末由匍匐及壙一觴遙奠文
又不足以盡意引領西望唯有涕沱而已嗚呼哀哉

祭李燔文

甲甲

嗚呼世降俗末名利滔滔人鮮知學士鮮爲己惟靈
天資雅正志識高遠絕去外慕專意實地所事不離
於經傳用工常在於身心講討服行不弛其力篤信

謹守進進不已竊嘗敬慕以爲士友之中終能深造而遠到者必子也豈料一疾數月奄然至此平生所期忽至墮甑豈但子之命也實吾黨之不幸也嗚呼哀哉尸居殘喘志氣日頹雖欲不負餘日自強無力尚幸賴君強輔得以提撕警益而今焉已矣同志難得後死日孤今日悼子者奚但遊好之情而已嗚呼日月幾何聞子之將入地也老病筋力末由及壙略抒悲懷以侑一觴精神昏塞又不能盡意英靈不昧當識茲心嗚呼哀哉

祭李澳文 乙酉

嗚呼哀哉去秋哭希敬冬又哭君同志繼歿後死日孤天之拯吾黨何其酷哉痛矣痛矣惟靈芝蘭之姿松桂之性趣操高潔行誼修飭早向正學以爲古入可期也吾性可復也志則嚶嚶行則涼涼斯實先聖之所願得者若假之年所至其可量耶病雖沉痾嘗謂君之志氣必當成就每以病之妨學爲歎而不以死生爲憂矣豈料其竟不得起耶命矣命矣嗚呼哀哉自我相從粵自丙寅今將二十季矣相信之誠久而愈篤每來相見輒有警發之益非君之資於我我實資於君逮茲衰昏垂死之境尤望君之提撕每擬

君爲強輔今君之不幸卽我之不幸也從今以後誰與共此餘日耶嗚呼昔季君之兄弟之南來也與彥暉而偕至朋簪之樂莫大焉未幾彥暉西還而徑逝伯氏奄忽於昨季今君又至於此十年之中蹤迹俱陳悲夫悲夫嗚呼君之疾革我未及知告訣之書乃作於屬纊之前二日而辭語不錯從容如平日卽此而可見學力之所得矣置之案上比來四十餘日每日一披見輒喟愴不忍讀所投冊子當如戒襲藏以待君之子之長而付之顧此季迫日索只是朝暮之人耳若不能待則亦當封付兒孫俾勿失墜君靈不

昧儻可以知此悲懷耶聞君之入地而末由往見緘辭遙奠不能盡此衷曲嗚呼哀哉

祭韓佑筭文

乙酉

嗚呼正叔何遽至斯昨者之來謂冬經重病頗有瘦容乃不俟完復不俟暄暖而輕動何耶一宿而疾作謂就永叔調治下去之際顏色甚不佳余心怪之而不知己爲死病也旣去之後日日相問而未聞向差之報憂悶殊甚猶恃年之未衰病亦偶感雖數日劇痛而自當漸蘇矣豈意其終至於不起也朝伴纔還而計乃隨至愕然驚慘何可勝言設位長慟不能已

已嗚呼哀哉君之從我遊已二季餘矣心正而識明氣和而行恭平生未嘗有一毫向人求知之意是以其學專用功於內而非他人之所能及也余嘗愛而敬之每與舍弟言而稱之矣實不料今日之相失也嗚呼何處復得斯人悲夫悲夫吾黨不幸前秋希敬逝冬公達天今君又至於此有志於學而皆不得長季此何天理耶豈但君等之命實我之命也嗚呼哀哉君來訪我乃以柩歸而老病人事日氣尚寒十里之地不能匍匐往訣唯有悲懷塞胸雙淚盈眼而已精神如喪言不能盡君行未遠儻識此心嗚呼哀

哉

告舍弟掌令文

丁亥

嗚呼與君相別已一月矣君則安卧於大化之中無所顧戀而我獨猶爲人抱此無限痛苦者何哉疇昔之夜我往見君君即開戶出迎宛如平日我前執手而問曰死人何以起來耶君終無答余心驚疑而覺乃一夢也嗚呼死生之別豈無所欲言者而病時言語先閉竟無一言而逝今又魂氣相尋而又無一言何其漠然如是耶嗚呼我知之矣心中所存常時無不盡到此更有何言君聞我言亦必笑之矣常日每

朝必遣信相挽夜來安否斷此已三十箇日今日欲往哭德甚不能動茲令孫兒持此告之君靈不昧其知之否耶嗚呼痛哉

祭舍弟掌令文 戊子

嗚呼自丁丑至今七十有餘季矣己酉以後又且四十年矣銜恤忍痛苟存視息鮮民之生不如死之久矣而唯以同氣相依為命為餘日之一幸矣歲辛未姊氏捐世與君同哭於樓山今君又棄我而先逝我獨胡為尚留於世耶嗚呼君於常時愛說東坡符到僂行之語少無顧戀之意及其病也雖不能言而顏

色恬然吾則終日相守而實不悟其將逝於其夕也君於是可謂允蹈其言而奈此後死何哉嗚呼痛哉君有高才遠識實過於人先見之明最不可及少欲有為於世三十之前僂以病廢晚仍沉淪於蓬蒿畎畝之中而輒到白首矣兄弟之間亦未能盡悉其所 有晚乃相信而惜其虛老况他人乎才否一區之死無聲昔人所歎矧復世道交喪蠻觸成風誰生厲階載胥及溺縱抱報國之心寧有出頭之地建康之冢骨易枯屏山之寶劍空藏嗚呼哀哉君之為邑人所難追真所謂愛百姓如妻子視守吏如奴僕處官事

明齋遺稿 卷三十四
如家事者也誠心所及吏民俱化一物不自私一毫不妄費其清如水其介如石朝決其歸夕已就途到家之日蕭然依舊末季鱗獨窮苦人不可堪而委命任分未嘗戚戚縕袍百結菜根一飯而處之泰然若自樂此凡如此類皆當於古人獨行中求之知德者希孰識其貴然德在已知不知在人亦何足闕焉嗚呼哀哉余昏且懦見事常遲以大者言之如向來之事見理不精處義不果卒之貽辱先人罔有紀極不肖之罪蓋莫勝贖其時不用君言非止一再追而悔之何可及也事已往矣無可言者至其居家日用應

事接物事無大小莫不就君而商量雖緩急互濟而余之資於君者實多且如容貌辭氣之末亦皆點檢而切磨之常見謂老後工夫尤不可弛警策之言不絕於耳內則兄弟外則朋友從今以後何可復得將如警之擿墮而無相矣將如人之任左肱而失右臂矣此尤余之所自深痛不但死生之別而已嗚呼哀哉日月有時君將歸復于土矣生無所媿死即其安有孫保家文獻不墜曾孫成雙君復何憂我來見君只見其樞樞今將隱但有陳迹音容雖闕精爽如存酌此一觴與君長言言不可盡悲不可極唯朝暮溘

明齋遺稿卷三十四
然可以同歸矣嗚呼哀哉

祭李三佐文 戊子

嗚呼哀哉人皆以君之績文勤業累取解元而終不成於一名爲恨得失在數此何足以爲君恨人皆以君之飭身行義季過半百而終不登於一命爲恨取舍在人此亦何足以爲君恨余之所恨於君者則有之矣以君聰明敏悟之資粹美端良之質若早拋科臼而奮然以正學自任則其所造詣必不止於今日之所就也此一恨也然君之志猶未艾也君之齒猶未暮也一朝斷置且將如轉戶樞耳晚節樹立猶可

期也而奄忽至此萬事墮甑此又一恨也雖然一生好善無求於外生無怨惡沒有餘休士生於世斯亦難矣抑又何恨至於累世積德之家生得如君之一介英才而終不得發揚闡大之又從而天闕之福善之理若是之舛此亦若可恨者而君之兩子俱佳天道豈終無報耶屈之久者其伸必大是不能無望於後人也嗚呼哀哉余已老矣耳目俱隔只如偶人君來每有以警發之或有以滋益之余亦每喜君之相信擬爲強輔今焉已矣誰與共此餘日間君之訃不能往哭今聞將入而亦不能往決替奠一觴緘辭

明齋遺稿 卷二十四
以得而心慙棄之不能盡意其靈不昧其知乎否
耶嗚呼哀哉

祭明村文

庚寅

嗚呼哀哉惟靈資稟篤實志氣正直威儀厚重操守
敦確內行淳備孝友維則允矣君子有此懿德問學
之程忠信是主存心檢身謹守規矩平生樹立內重
外輕文少於質實過其名爲國之忠人不可及身居
畎畝憂甚肉食揚于王庭可見其業乃與時違空
老蓬華公不自悔我亦奚憾尚有公議應爲慨惜嗚
呼斯文淑慝百世是非砥柱獨立自信不疑爰初抗

疏懇懇其誠一字一句可質神明世道交喪仁義充
塞人將相食莫知其極悶時痛俗身任距闕惟惑難
開反謂我辟來者不聞昔人所歎嗚呼噫曷足復
云嗚呼嗟吾兄弟自少至老相資相慕以義以道兩
心所存靡有諱忌環顧一世此實無二我弟云亾公
所淡慟公又至此我懷焉控每有書札不忘警益未
死之前何處復得緘辭侑觴欲抒方寸神昏氣索竟
不能盡幽明雖間理無不通英靈不昧當照茲衷嗚
呼哀哉

祭趙文成

得

入

辛卯

鳴呼哀哉惟靈溫如玉表裏若一斷斷好善終始不失恬淡無求靜正自守維此懿德何處覓觀嗚呼昔年抗疏三人一心隆師義重爲國誠淡奈彼流禍莫知其終只應畱待後來晦翁嗚呼五老之稱吾弟所詩弟既先逝顯道繼之兄又至此後死日孤文玉昨來相對悲吁嗚呼往往庚辰歸省先墓兄自加平委來叙晤臨分有約更圖一握孰謂此別便成永訣嗚呼聞兄即遠遙奠一觴神昏氣索言不盡情朝暮乘化同歸冥漠兄靈不昧儻照心曲嗚呼哀哉

祭再從子道教文

壬辰

嗚呼伯循雅端其表恬靖其中天資之美可謂難得及其就學服膺勤謹讀書績文晨夕不懈庶幾立揚以振家聲矣豈料蹉跎半世竟未大闡末路潦倒終於下縣耶悲夫悲夫嗚呼以我先兄之德義志業不克享季乃天闕於中途公私悼痛愈久未已嗇躬燾後在理當然而君既止此子又先亾乃以猶子之子爲之後天道難謀一至於此痛矣痛矣嗚呼昔我家塾諸少競爽滿目琳琅君與貫一爲之領袖追思舊事忽忽四十餘季矣窮通在命不足復言而顧乃相隨逝云貫一於庠吾家兩姪則少者化爲黃壤

明齋遺稿卷三十四
久矣大者亦僅五十而歿以此相方君猶最優哀哉
哀哉嗚呼嗟余老物尚爾不死每見逾理之慘恆抱
悲懷昨者撫柩一慟豈能洩哀今聞入地末由臨穴
替奠一觴與君長訣神昏氣索言不盡情君靈不昧
尚識茲心嗚呼哀哉

祭再從弟聖汝

按文癸巳

嗚呼哀哉自君之逝忽忽九十餘日矣纔得一見於
夢中此心之悲何日忘之嗚呼兄弟朋友之間一心
相信者亦自難得矣惟君於我自少至老相愛之誠
無有厭斁惟兩心知之矣君之少我二十餘歲常謂

吾死之後君來治我醫矣豈料今日我反哭君耶天
道之舛何至是耶嗚呼哀哉君自向學之初未嘗一
日弛其力而不得充其量中心貞固容貌整飭謂可
得壽而竟未得周甲至於外物之儻來者無足輕重
而亦僅沾一命命道之不淑亦何至此耶嗚呼哀哉
日月有時窳窳之事已迫幽明之間從此永隔矣然
我亦朝暮之人幾何而不同歸於太虛耶精神昏塞
不能成文以侑一觴君靈不昧儻識茲心嗚呼哀哉

明齋先生遺稿卷之二十四

